

四庫全書

經部

# 欽定四庫全書

經部

欽定周官義疏

御製

三禮義疏序

目錄

卷首

詳校官監察御史臣施朝幹

刑部郎中臣許兆椿覆勘

覆校官監丞臣侍朝

校對官主事臣張培

謄錄舉人臣吳壽朋

欽定四庫全書

御製三禮義疏序

三禮之傳遠矣周禮六官河間獻王上之儀禮十七篇  
禮記四十九篇高堂生戴聖傳之漢唐以來箋疏訓釋  
無慮數十家攷其義或相牴牾先儒嘗譏其聚訟要其  
撮拾灰燼之餘傳先王制作之舊得什一於千百好古  
者所為鄭重而愛惜之也我

皇祖聖祖仁皇帝表章羣經既

御纂周易折中而詩書春秋則以分授儒臣纂輯義疏頒布海內惟三禮未就朕御極之初儒臣上言今當經學昌明禮備樂和之會宜纂輯三禮以藏五經之全爰允其請開館編校越十有一年冬告竣夫禮之所為本於天敎於地達之人倫日用行於君臣父子兄弟夫婦朋友之間斯須不可去者天不變道亦不變此其本也其制度品節服物采章隨時損益屢變以適其宜者禮之文也三代去今數千年矣修其教而教明循其道而道

行謂三代至今存可也何則其本得也若其用之朝廷  
邦國名物器數之具周旋進退之儀雖先王處此必將  
變通以適其宜而不泥於其迹故言禮者惟求其修道  
設教之由以得夫禮之意而已顧其教之不泯道之所  
由傳未嘗不賴於經好學深思之士讀其書有惜不能  
俯仰揖讓於其間者先王制作之精意尚可想見於抱  
殘守闕之餘則經傳之為功也大矣鼎彝鉤劍之遺篆  
籀之蹟流傳有自尚摩挲而寶護之况制作之精意所

賴以傳者歟獨其質於衆說無所取衷爰命校纂諸臣  
芟煩截浮約文申義敷暢厥旨至其說之不可強同者  
稍為辨正而仍其舊蓋其承傳各異必牽合附會比而  
同之則其惑也滋甚故無取焉刻既成為之敘論以發  
其端俾隆禮者有所考云

乾隆十三年冬十月朔



原任經筵講起居注實保保和殿學士兼吏部尚書兼翰林院掌院事臣張廷玉

原任太傅文華殿大學士兼吏部尚書兼管兵部尚書臣朱軾

原任太子少保吏部尚書臣甘汝來

副總裁

經筵講官太子太傅工部尚書臣汪由敦

太子太保江南河道總督臣尹繼善

原任經筵講官太子太保協辦大學士吏部尚書後任兩廣總督臣陳大受

原任禮部尚書臣楊名時



原任太子少保尚書銜教習庶吉士臣徐元夢

原任都察院左都御史臣彭維新

原任禮部侍郎臣李清植

原任刑部右侍郎銜管禮部侍郎事臣王蘭生

原任內閣學士兼禮部侍郎臣李紱

原任宗人府府丞臣任啓運

原任翰林院侍講品級頂帶臣方苞

提調

內閣侍讀臣舒興阿

日講起居注官司經局洗馬臣佟保

原任內閣侍讀學士今陞戶部侍郎臣兆惠

原任翰林院侍讀今陞倉場侍郎臣雙慶

原任內閣侍讀今陞吏科給事中臣岱圖

原任內閣侍讀今陞戶部銀庫員外郎臣赫泰

原任內閣侍讀今陞甘肅安西道臣文綬

纂修

左 春 坊 左 贊 善 臣 諸 錦

翰 林 院 編 修 臣 朱 佩 蓮

日 講 起 居 注 官 翰 林 院 檢 討 臣 王 太 岳

翰 林 院 檢 討 臣 李 英

原 任 翰 林 院 侍 讀 學 士 今 陞 內 閣 學 士 臣 錢 維 城

原 任 通 政 司 右 通 政 臣 胡 中 藻

原 任 貴 州 按 察 使 臣 徐 以 升

原 任 翰 林 院 侍 讀 學 士 臣 熊 暉 吉

原任翰林院侍讀<sub>臣</sub>惠士奇

原任翰林院侍讀<sub>臣</sub>徐用錫

原任翰林院侍讀<sub>臣</sub>楊述曾

日講起居注官翰林院講學今陞四川北道<sub>臣</sub>宋邦綏

日講起居注官翰林院修撰<sub>臣</sub>梁國治

原任司經局洗馬<sub>臣</sub>官獻瑤

右春坊右庶子<sub>臣</sub>葉酉

原任中允<sub>臣</sub>程恂

原

任

編

修臣李龍官

原

任

編

修臣吳紱

原

任

編

修臣何其睿

原

任

編

修臣張為儀

原

任

編

修臣姚範

原

任

編

修臣潘乙震

原

任

編

修臣湯大紳

原

任

編

修臣羅暹春

原

任

檢

討臣出科聯

原

任

檢

討臣王康佐

原

任

庶

吉

士臣宋照

原

任

監

察

御

史臣趙青藜

原

任

監

察

御

史臣杭世駿

原

任

編

修

今

陞

御

史臣

李友棠

原

任

編

修

今

陞

御

史臣

陳顧澣

原

任

宗

人

府

主

事

臣

王文清

禮部主客司主事臣鍾琬

原任兵部武選司主事臣潘永季

原任工部司務臣蔡德晉

原任國子監司業臣李光墀

原任庶吉士今陞雲南糧儲道臣徐鐸

原任編修今陞河南汝寧府知府臣王錦

原任福建興化府通判臣吳廷華

原任山西吉州知州臣王文震

廣西賓州知州臣潘汝誠

原任湖北蘄州知州臣王士讓

原任湖南長沙縣知縣臣姚汝金

舉人臣姜兆錫

優貢生臣陶敬信

副榜貢生臣方天游

收掌

翰林院筆帖式臣伊靈阿



原任內閣中書今陞侍讀臣多爾濟

原任內閣侍讀臣羅慶

原任內閣中書今陞戶部員外郎臣常安

原任內閣中書今陞禮部員外郎臣索爾遜

原任內閣中書今陞盛京刑部主事臣務實

原任內閣中書臣林保

原任翰林院筆帖式臣常齡

原任翰林院筆帖式臣栢壽

原任內閣中書今陞湖北宜昌府知府

臣

阿爾布

原任內閣中書今陞山東武定府同知

臣

寧泰

原任翰林院待詔今陞江南松江府同知

臣

嵩齡

武英殿監造

內務府堂主事紀錄一次

臣

安泰

內務府驍騎副叅領加一級紀錄一次

臣

富惠

監

造

臣

高永仁

欽定周官義疏凡例

一春秋傳云先君周公作周禮其所稱引則此經中無有也蓋周禮指當時上下所行五禮之經曲以別於夏殷之禮此則分職命官之籍故揭於篇首曰治典教典禮典政典刑典事典漢志本稱周官經周官傳至唐以後乃更名周禮朱子及鄭樵輩曾辨之今仍曰周官從其始稱且按以五官之職事於義為當也

一六典乃周公兼三王之道盡人物之性運用天理以法萬世之書也伏讀

聖制日知薈說十則皆五官精義灼見治本深契道揆謹冠全書以為治經者之準的次列經傳及大儒之語義貫全經者為綱領其次則傳經源流又其次則諸儒論行周官之得失讀周官之法與夫注解者之得失竝附焉

一易有程傳朱子本義詩有朱子集傳書有蔡沈

集傳亦經朱子指授故折中彙纂皆奉以為宗  
視其離合以為衆說之去留春秋則有不用胡  
傳更立一義者三禮自朱子請修而未果羣言  
莫適為主即儀禮經傳通解亦僅開其端緒而  
意義則未暇發明陳澧禮記集說雖列於學官  
而自始出即不饜衆心茲故特起義例分為七  
類俾大義分明而後兼綜衆說一曰正義乃直  
詁經義確然無疑者二曰辨正乃後儒駁正舊

說至當不易者三曰通論或以本節本句參證  
他篇比類以測義或引他經與此經互相發明  
四曰餘論雖非正解而依附經義於事物之理  
有所推闡五曰存疑各持一說義亦可通又或  
已經駁論而持此者多未敢偏廢六曰存異名  
物象數久遠無傳難得其真或創立一說雖未  
即愜人心而不得不姑存之以資考辨七曰總  
論本節之義已經訓解又合數節而論之合一

職而論之以此七類叙次排纂庶幾大指開卷  
了然而旁推交通義類可曲盡也案語各以類  
附七條之後或辭義連貫難以分析則附於最  
後一條之末

一朱子儀禮經傳通解萃三禮而類別之又附益  
以他書故經傳之文間見錯出茲則三禮分編  
各為一書五官之文悉從其舊概無移動

一漢武帝求遺書得周官五篇司空職亡漢人以

考工記附之名曰冬官非其實也茲稱考工記  
以從其朔

一宋五子遵周易折中稱子鄭康成稱字其餘講  
說之家皆以名書

一所取各家之說以經文先後為序不以其人之  
時代

一賈疏釋注者雙行小書各分附本注之下後儒  
說及案語與注疏相證相足者亦然其推闡經



義者大書特列

一職方輿地古今異名既採昔人所考辨仍著目  
今府州縣名使學者易曉疑則闕焉

一周官有古文今文異本賈疏云劉向未校之前  
或在山巖石室有古文考校後為今文鄭據今  
文注故云故書作某蓋故書即古文也其杜子  
春鄭司農所讀有異同者竝列焉茲不敢芟薙  
另提附經文音切之下其因此有所論說者仍

存本注

一古今器物殊制異名鄭康成在東漢之季猶為近古然考工記注語簡而意澁難以盡通謹詳繹記文及注疏可解者解之非確有所見不敢臆決以俟知者

一宋元明諸家有取注疏改換敷衍以為已說者有詞語冗蔓無所發揮及顯與理悖不足惑人者概從薙芟亦不置辨

引用姓氏

漢

司馬氏

遷

子長

龍門

孔氏

安國

子國

毛氏

萇

劉氏

安

京氏

房

君明

劉氏

向

子政

揚氏

雄

子雲

劉氏

歆

子駿

杜氏

子春

班氏

固

孟堅

扶風

賈氏

逵

景伯

鄭氏

興

少贛

鄭氏

衆

仲師

司農

馬氏

融

季長

盧氏

植

許氏

慎

叔重

服氏

虔

子慎

鄭氏

康成

何氏

休

邵公

應氏

劭

仲瑗

劉氏

熙

成國

徐氏

幹

偉長

李氏

巡

虞氏

翻

仲翔

陸氏

績

公紀

王氏

肅

子邕

韋氏

昭

弘嗣

晉

杜氏

預

元凱

干氏

寶

令升

郭氏

璞

景純

宋

范氏

蔚宗

梁

沈氏

峻

崔氏

靈恩

北魏

酈氏

道元

善長

李氏

謚

永和

呂氏

忱

隋

王氏

通

仲淹

文中子

唐

魏氏

徵

元成

陸氏

元朗

德明

顏氏

師古

竹榴



孔氏 穎達 仲達 一作冲遠

賈氏 公彦

司馬氏 貞

趙氏 圭 伯循

杜氏 佑 君卿

孫氏 恂

成氏 伯瑜 一作伯璵 中山

宋

邢氏

曷

叔明

聶氏

崇義

洛陽

陳氏

襄

述古

古靈

胡氏

瑗

翼之

安定

石氏

介

守道

祖徠

歐陽氏

修

永叔

廬陵

劉氏

敞

原父

公是

范氏

鎮

景仁

司馬氏

光

君實

涑水

王氏

安石

介甫

臨川

劉氏

彛

執中

長樂

周子

敦頤

茂叔

濂溪

張子

載

子厚

橫渠

程子

顥

伯淳

明道

程子

頤

正叔

伊川

范氏

祖禹

淳夫

華陽

陸氏

佃

農師

曾氏

鞏

子固

南豐

蘓氏

軾

子瞻

東坡

蘓氏

轍

子由

潁濱

沈氏

括

存中

陳氏

祥道

用之

長樂

陳氏

暘

晉之

楊氏

時

中立

龜山

呂氏

大臨

興叔

藍田

呂氏

大鈞

和叔

謝氏

良佐

顯道

上蔡

李氏

靚

泰伯

盱江

葉氏

夢得

少蘊

石林

劉氏

恕

道原

南康

胡氏

安國

康侯

建安

胡氏

宏

仁仲

五峯

夏氏 休

胡氏 銓 邦衡 澹菴

王氏 昭禹 光遠 東巖

鄭氏 樵 漁仲 夾漈

程氏 迥 可久 沙隨

林氏 勛

陳氏 彥羣

朱子 熹 元晦 紫陽

林氏

之奇

少穎

呂氏

祖謙

伯恭

東萊

陳氏

傅良

君舉

止齋

張氏

栻

敬夫

南軒

項氏

安世

平父

平菴

薛氏

季宣

士龍

永嘉

鄭氏

伯熊

景望

永嘉

葉氏

時

秀黻

竹埜

俞氏

庭椿

壽翁

臨川

王氏

炎

晦叔

雙溪

蔡氏

元定

季通

西山

蔡氏

沈

仲默

九峯

黃氏

幹

直卿

勉齋

陳氏

淳

安卿

北溪

鄭氏

鈞

剛中

三山

史氏

浩

直翁

四明



方氏 慤 性夫 嚴陵

劉氏 迎

楊氏 簡 敬仲 慈湖

楊氏 恪 謹仲

陳氏 汲 及之

鄭氏 伯謙 節卿 永嘉

李氏 叔寶 景齊

葉氏 適 正則 水心 龍泉

易氏 祓 彦祥 山齋 長沙

薛氏 衡 平仲

曹氏 叔遠 器遠

林氏 椅 奇卿

陳氏 汪 蘊之

趙氏 溥 蘭江

李氏 嘉會 子華

孫氏 之宏 偉夫

楊氏 復 信齋 長溪

晁氏 公武

真氏 德秀 希元 西山

魏氏 了翁 華父 鶴山

王氏 與之 次點 樂清

李氏 如圭 實之

章氏 如愚 俊卿 山堂

王氏 應麟 伯厚 深寧叟 浚儀

朱氏

申

周翰

建安

歐陽氏

譙之

希遜

毛氏

彥清

毛氏

一清

嚴氏

繁

坦叔

華谷

林氏

希逸

庸齋

福清

王氏詳說

溫州府志樂清王十朋著周禮詳說

禮圖說

禮庫

以上二書王與之訂義所採未  
著作者姓名

唐氏

以上二人訂義所採未著其名

毛氏

元

馬氏

端臨

貴與

吳氏

澂

幼清

草廬

臨川

劉氏

瑾

公瑾

安成

毛氏

應龍

介石

豫章

敖氏

繼公

君善

長樂

丘氏

葵

吉甫

鈞磯翁

清源

陳氏

友仁

明

朱氏

升

允升

楓林

梁氏

寅

孟敬

石門

薛氏

瑄

德溫

敬軒

丘氏

濬

仲深

瓊山

何氏 喬新 廷秀 耕邱 廣昌

舒氏 芬 國裳 梓溪

王氏 鏊 濟之 守溪

楊氏 慎 用修 升菴

魏氏 校 子才 莊渠

李氏 如玉

陳氏 深 子淵 長興

金氏 瑤 德溫 休寧

郎氏

地玉

完白

仁和

歸氏

有光

熙甫

震川

王氏

樵

明逸

方麓

柯氏

尚遷

喬可

陽石山人

王氏

應電

昭明

明齋

唐氏

樞

孫氏

攀

士龍

宣城

鄧氏

元錫

汝極

潛谷



郝氏 敬 仲興 楚望

全氏 賜

柯氏 潛

郭氏 良翰 道憲 莆田

王氏 志長 平仲 婁里

張氏 采 受先 婁東

雜說

周禮菁華

引用姓氏

官制

以上三書王志長刪翼所採未  
著作者姓名又刪翼中多有有  
氏無名者

欽定周官義疏目錄

經部四

禮類一

周禮之屬

卷首

聖制

綱領

總辨

卷一

天官冢宰第一之一

序官

卷二

天官冢宰第一之二

大宰

卷三

天官冢宰第一之三

小宰  
宰夫

卷四

天官冢宰第一之四

卷五

亨人	宮正
甸師	宮伯
獸人	膳夫
戲人	庖人
鼈人	內饔
腊人	外饔

天官冢宰第一之五

醫人	醫師	食醫	疾醫	瘍醫	獸醫	酒正
鹽人	漿人	凌人	籩人	醢人	醢人	掌次
冢人	宮人	掌舍	幕人	掌次		

卷六

天官冢宰第一之六

大府	王府	內府	外府	司會	司書
職內	職歲	職幣	司裘	掌皮	

卷七

天官冢宰第一之七

內宰

內小臣

閹人

寺人

內豎

九嬪

世婦

女御

女祝

女史

典婦功

典絲

典枲

內司服

縫人

染人

追師

屨人

夏采

卷八

地官司徒第二之一

序官

卷九

地官司徒第二之二

大司徒

卷十

地官司徒第二之三

小司徒  
鄉師

卷十一

地官司徒第二之四

鄉大夫  
州長  
黨正  
族師  
閭胥  
比長

卷十二

地官司徒第二之五

封人 鼓人 舞師 牧人 牛人 充人  
載師 閭師

卷十三

地官司徒第二之六

縣師 遺人 均人 師氏 保氏 司諫  
司救 調人 媒氏

卷十四

地官司徒第二之七



司市 質人 廛人 胥師 賈師 司隸  
司稽 胥 肆長 泉府 司門 司關  
掌節

## 卷十五

### 地官司徒第二之八

遂人 遂師 遂大夫 縣正 鄙師 鄼長  
里宰 鄰長

## 卷十六

### 地官司徒第二之九

旅師 稍人 委人 土均 草人 稻人  
土訓 誦訓 山虞 林衡 川衡 澤虞

迹人

升人

角人

羽人

掌葛

掌染草

掌炭

掌茶

掌蜃

圃人

場人

廩人

舍人

倉人

司祿

司稼

春人

饅人

稟人

## 卷十七

### 春官宗伯第三之一

序官

## 卷十八

### 春官宗伯第三之二

大宗伯

卷十九

春官宗伯第三之三

小宗伯 肆師

卷二十

春官宗伯第三之四

鬱人 鬯人 雞人 司尊彝 司几筵  
天府 典瑞

卷二十一

春官宗伯第三之五

典命 司服 典祀 守祧 世婦 內宗  
外宗 冢人 墓大夫 職喪

卷二十二

春官宗伯第三之六

大司樂

卷二十三

春官宗伯第三之七

樂師 大胥 小胥 大師 小師 瞽矇  
眡瞭 典同 磬師 鍾師 笙師 鐃師  
鞀師 旄人 籥師 籥章 鞀 鞀氏  
典庸器 司干

卷二十四

春官宗伯第三之八

大卜 卜師 卜人 龜人 筮氏 占人  
筮人 占夢 眡祲

卷二十五

春官宗伯第三之九

大祝 小祝 喪祝 甸祝 詛祝 司巫  
男巫 女巫

卷二十六

春官宗伯第三之十

大史 小史 馮相氏 保章氏 內史  
外史 御史

卷二十七

春官宗伯第三之十一

巾車 典路 車僕 司常 都宗人  
家宗人 以神仕者

卷二十八

夏官司馬第四之一

序官

卷二十九

夏官司馬第四之二

大司馬 小司馬 軍司馬 輿司馬  
行司馬

卷三十

夏官司馬第四之三

司勳 馬質 量人 小子 羊人 司燿  
掌固 司險 掌疆 候人 環人 挈壺氏  
射人 服不氏 射鳥氏 羅氏 掌畜

卷三十一

夏官司馬第四之四

司士 諸子 司右 虎賁氏 旅賁氏  
節服氏 方相氏 大僕 小臣 祭僕  
御僕 隸僕

卷三十二

夏官司馬第四之五

弁師 司甲 司兵 司戈盾 司弓矢  
繕人 橐人 戎右 齊右 道右 大馭  
戎僕 齊僕 道僕 田僕 馭夫 校人  
趣馬 巫馬 牧師 廋人 圉師 圉人

卷三十三

夏官司馬第四之六



職方氏 土方氏 懷方氏 合方氏  
訓方氏 形方氏 山師 川師 遼師  
匡人 撝人 都司馬 家司馬

卷三十四

秋官司寇第五之一

序官

卷三十五

秋官司寇第五之二

大司寇 小司寇 士師

卷三十六

秋官司寇第五之三

鄉士	遂士	縣士	方士	訝士	朝士
司民	司刑	司刺	司約	司盟	職金
司厲					

卷三十七

秋官司寇第五之四

犬人	司圜	掌囚	掌戮	司隸	罪隸
蠻隸	閔隸	夷隸	貉隸	布憲	禁殺戮
禁暴氏	野廬氏	蜡氏	雍氏	萍氏	
司寤氏	司烜氏	條狼氏	脩閭氏	冥氏	

庶氏 穴氏 翼氏 柞氏 薙氏 砮蒺氏  
翦氏 赤发氏 蜎氏 壺涿氏 庭氏  
銜枚氏 伊耆氏

## 卷三十八

### 秋官司寇第五之五

大行人 小行人

## 卷三十九

### 秋官司寇第五之六

司儀 行夫 環人 象胥 掌客 掌訝  
掌交 掌察四方 掌貨賄 朝大夫 都則

都士 家士

卷四十

考工記之一

三十二總叙 輪人 輿人 輶人

卷四十一

考工記之二

攻金 築氏 冶氏 桃氏 鳧氏 栗氏  
段氏 函人 鮑人 韞人 韋氏 裘氏

卷四十二

考工記之三

畫續 鍾氏 筐人 愷氏 玉人 柳人  
雕人 磬氏 矢人 陶人 旒人

卷四十三

考工記之四

梓人 廬人 匠人

卷四十四

考工記之五

車人 弓人

卷四十五

周官圖一

卷四十六

周官圖二

卷四十七

周官圖三

卷四十八

周官圖四

臣等謹案周官義疏四十八卷乾隆十三年  
欽定周官於漢時最為晚出又經劉歆王安石輩  
用之而悞致漢儒若何休宋儒若蘇轍胡宏  
皆有異議然三代以上大經大法非是書莫  
由考見康成之注公彥之疏迭有闡發宋時  
說者益衆而王昭禹之詳解王與之之訂義  
尤為詳博明儒若王應電之集傳王志長之  
刪翼亦足羽翼前儒我

皇清特命儒臣蒐討自漢以來諸家之說詳加甄錄而

案語推闡精微凡漢儒所假託者悉為抉摘使不為全經之蠹蓋程朱所疑而未決者至

今日乃昭然揭日月云乾隆四十年九月恭校上

總纂官臣紀昀臣陸錫熊臣孫士毅

總校官臣陸費蟬



欽定四庫全書

欽定周官義疏卷首

聖制

大宰統百官其專司也而以九職任萬民則司徒之事而  
仍為大宰所統也大宰之均四海於凡九職之事九職之  
民莫不使之安其間里足其衣食無游手以失職者無飢  
寒以失業者無背禮而棄義者無奇巧以惑衆者夫如是  
則敷天之下固不率俾五穀以時庶物遂生所謂因民之

利而利之而民之蒙利已無窮矣或謂周禮為理財之書雖大宰亦掌其事不知先王言利利在民後世言利利在官安可以後世附會之說謫先王之良法美政哉周禮天府掌祖廟之守藏與其禁令凡國之玉鎮大寶器藏焉獻民數穀數則受而藏之先儒以為重民穀之事與玉鎮大寶同而余則以為有過之無不及也何則國以民為本民以食為天民食足而後教化興教化興而後國治安國治安而後祖宗之器得以常守而弗墜

是民穀之數重於守器也且欲周知民情莫若周知民  
數欲周知民數又莫若周知穀數蓋能周知穀數則歲  
之豐歉可稽民之生齒可考由是均其土壤定其邑里  
秩其多寡平其政令舉天下之大而燭照數計兼并者  
無所容其巧也先王於其登獻之時必拜受而藏於天  
府不以是哉

周禮寓兵於農時無養兵之費然以戰陣之事教畊鑿  
之民日教之則勞月教之則踈而當時不見其害者以

處之得其當也大司馬掌四時之田仲冬大閱前期羣  
吏戒衆脩戰法則春蒐夏苗秋獮視此矣數月之中而  
以數日脩戰法則民不勞前期試之則民有餘暇必朝  
夕自試於坐作進退刺擊之法可知

周禮遂人治野以下劑致氓盖氓或自六鄉徙而出或  
自侯國徙而來無田之可耕而輕去其鄉必皆逐利以  
居者也是必有以還定安集之使有恒產而後有恆心  
且六遂在鄉之外其去王都也遠其為土地也博故其

致畛雖受田有上中下之殊而及其會之惟以下劑為率而可任也者家僅二人則所以優之者至厚此天下之民皆悅而願為之畛也然田有上中下之差而任之一準以下劑人又孰肯受其田之下者是徒以利起民之爭而政亦不平故其後又繼之以辨野之土田均百畝而萊則有五十畝百畝二百畝以上中下為差焉夫遂人安畛以田里擾畛以樂昏教畛以稼穡利畛以興鋤勸畛以時器任畛以疆予而終之以土均平政致之

之後所以安定教導之者又如此其備於是無恒心之  
旤患化而為有恒心之民也豈僅一招致之術哉

小行人之職命之以五物巡行諸國而辨異之以反命  
於王俾周知天下之故至五物之終有曰以康樂和親  
安平為一書非誇政治之美而張大其辭也蓋以民莫  
不欲康樂其室家和親其宗族安平其鄉里而好為背  
禮棄義以干犯法紀者凶荒之苦政治之乖有以驅之  
而遂以法繩之此小民無知而干憲典者所當哀矜而

拯救之也周公以為利害之興除已當政教之養恬靡遺人事無悖逆之失天道無凶荒之厲然後可收康樂和親安平之效而大同之風以成其尚有未周則必精察其故或競綵張弛之有悖以致天譴而釀民患兢兢靡寧乾乾惕若俯仰跼蹐而不敢少康蓋導王敬天勤民之本均在於此矣

周禮籥章凡國祈年於田祖則歛豳雅擊土鼓以樂田畯按豳雅之什曰誕后稷之穡有相之道所謂輔相天

地之宜也。弗厥豐草，種之黃茂，即其事也。必人事盡於下，然後有以輔成帝命率育之心，而黍稷實穎實粟，故能為酒醴以祭先祖，而洽百禮。其詩曰：壽考維祺，以介景福。樂嘉報之無已也。而簫章歛此以樂田畯，即所以樂田祖也。田畯者，古之勞農，勸相司嗇教稼，嘗有功於農事，為田祖所佑者也。祈年於田祖，而歛豳雅擊土鼓以樂田畯，蓋云田畯是享庶乎有以佐神農氏之治，而興我稼穡云耳。且歛豳以祭舉國之民，皆與焉。於是乎



得聞先王重本勤民康功田功之事先民勤勞稼穡以  
祇率懿訓之休而東作西成競相勸勉惟土物愛罔敢  
怠弛盡人事之勤獲天時之報此又周公制禮之本意  
所以為萬世勸農之法也歟

周禮禁原蠶論者謂蠶馬同以天駟房星為祖物莫能  
兩大再蠶則蠶盛而馬耗禁之所以蕃馬也蠶既與馬  
同氣恐蠶盛傷馬獨不恐馬盛傷蠶乎意者校人祭天  
駟而馬質掌馬政使竝掌蠶禁所以禁原蠶者恐其氣

竭則來年之蠶不能蕃滋所以節盈虛消長以為旱物  
育材之本耳究而言之蠶之為用在民而上供絲枲則  
仍入乎官馬之為用在官而成羣阡陌則仍利乎民聖  
人之政亦惟斟酌損益與時偕行期於政脩物阜而已  
又何容心於蠶馬之分哉

周禮夏官司勲掌有功者於其生也銘書于王之太常  
君牙所謂厥有成績紀于太常是也於其沒也祭於大  
烝盤庚所謂茲予大享於先王爾祖其從與享之是也

然考司勲之職國功民功皆在所等而官獨列於司馬者尤見先王敬軍事慎戰功之意易師之上六曰大君有命開國承家小人勿用師之終賞之慎也以為非是不足以為勸也周禮小司馬軍司馬輿司馬行司馬之官其所職掌不具載此如冬官之文缺耳或以為運籌帷幄決勝千里是在臨時應變非可勒為成書依而行之者故祕而不宣非也周官所載政事之顯然者耳臨陣之幾非書所能載亦非體所宜載雖諸職具存亦不

宜有此也若有此則宜見於主軍之大司馬不宜散列  
羣職以是知其為缺也聖人之政豈有隱哉

周禮膳夫酒正王及后世子不會之文後世有必不可  
行之勢而行之且必有害者蓋太宰以九式佐王均節  
財用四曰羞服之式所以量入為出定為法式使無奇  
服異味酣飲之失則不會而猶會也第不令膳夫酒正  
以羣有司而準法以沮王及后世子耳唐太宗興國之  
君過信經義詔令太子用庫物有司勿為限制馴致承

乾驕奢過度不終其德後雖悔之不可及也是猶公羊  
復讐之說誤用於漢武之世而征伐之禍興王安石據  
國服取於民之說神宗信之而青苗之弊劇皆不善法  
古之前鑒也

周禮大司樂奏黃鍾歌大呂以祀天神奏大簇歌應鍾  
以祭地亦奏姑洗歌南呂以祀四望奏蕤賓歌林鍾以  
祭山川奏夷則歌中呂以享先妣奏無射歌夾鍾以享  
先祖禮從其宜周禮固不可強同於今但六樂相配亦

非無其義因思黃鍾子也大呂丑也子與丑合故奏黃  
鍾則歌大呂大簇寅也應鍾亥也寅與亥合故奏大簇  
則歌應鍾推而至於無射夾鍾莫不皆然蓋月之斗建  
與日之躔度相配合之位也賈公彥疏云奏據出聲而  
言歌據合曲而言其實歌奏通也此語則似有訛夫清  
濁同均者尚不可合用豈有清濁不同均而可合用之  
理蓋既云奏則但奏其樂而不歌既云歌則始作樂以  
合人聲耳奏與歌自必各為一事惟奏以黃鍾為宮者

歌時則以大呂為宮之樂配之奏以大簇為宮者歌時則以應鍾為宮之樂配之如此則無所謂礧難施行者矣





綱領上

尚書周官曰立太師太傅太保茲惟三公論道經邦變  
理陰陽官不必備惟其人少師少傅少保曰三孤貳  
公弘化寅亮天地弼予一人冢宰掌邦治統百官均  
四海司徒掌邦教敷五典擾兆民宗伯掌邦禮治神  
人和上下司馬掌邦政統六師平邦國司寇掌邦禁  
詰姦慝刑暴亂司空掌邦土居四民時地利六卿分  
職各率其屬以倡九牧阜成兆民

孟子曰周公思兼三王以施四事其有不合者仰而思之夜以繼日幸而得之坐以待旦

程子曰有關雎麟趾之意然後可以行周官之法度

朱子曰周官徧布精密乃周公運用天理爛熟之書

古人學校教養德行道藝選舉爵祿宿衛征伐師旅田役只是一項事周公所以立下許多條貫皆是從廣大心中流出比問族黨之法正周公建大平之基本周禮一書廣大精密周家法度在焉

張氏栻曰凡井田封建取士建官禮樂政刑雖起於上世莫備於周是皆周公心思之所經緯本諸三代而達之者也周公之心孟子發明之至矣

以上經傳大儒之語義貫

全經者

李氏覲曰昔劉子駿鄭康成皆以周禮為周公致太平之迹而臨孝存謂末世之書作十難七論以排之何休以為六國陰謀竊觀六典之文其用心至患非古聰明睿知孰能及此其曰周公致太平者信矣

朱子曰周禮胡氏父子以為是王莽令劉歆撰此恐不然周禮是周公遺典也 周禮是周家盛時聖賢制作之書 周禮細碎處雖可疑其大體直是非聖人做不得 制度之書惟周禮儀禮可信禮記便不可深信周禮畢竟出於一手 惟周禮是周道盛時聖賢制作之書若國語等類皆衰周末流文字其間有雜入一時僭竊之禮

孫氏之宏曰周禮晚出孔孟既無明言不幸劉歆用之

而大壞王安石用之而益壞儒生學士遂以為無用  
於後世然究觀其書以道制欲以義防利以德勝威  
以禮措刑藹然唐虞三代之意非春秋戰國以後所  
能髣髴也學者欲知先王經制之備舍此書將焉取  
之

以上論周官  
為周公所作

程子曰周禮不全是周公之書法亦有漢儒撰入者  
張子曰周禮是的當之書其間必有末世增入者然不  
可以此病周禮

金氏瑤曰此書周公治天下之大經大法其有關於治

道甚大漢人亂以偽句遂使程朱二大儒不欲注而

國家因以不列於學官偽亂之賊經甚矣

以上論周官亦有後

人竄入者

漢書藝文志周官經六篇王莽時劉歆置博士

師古曰即今之

周官禮也亡其冬官以考工記充之

周官傳四篇

孔氏穎達曰漢初為傳訓者皆與經別行

馬融為周官注欲省學者兩讀故具載本文後漢以來始訖經為注

軍禮司馬法百五

十篇 六國之君魏文侯最為好古孝文時得其樂

人竇公獻其書乃得周官大宗伯之大司樂章也

河間獻王傳河間獻王德修學好古所得書皆古先秦舊書周官尚書之屬

後漢書儒林董鈞傳中興鄭衆傳周官經後馬融作周官傳授鄭康成康成作周官注 鄭興傳興字少贛河南開封人建武六年徵為大中大夫興好古學尤明左氏周官長於歷數自杜林桓譚衛宏莫不斟酌焉 賈逵傳逵父徽從劉歆受左氏春秋兼習國語

周官章帝建初元年詔達入講北宮白虎觀南宮雲  
臺詔令作周官解詁 盧植傳靈帝熹平四年植疏  
曰中興以來通儒達士班固賈逵鄭興父子毛詩左  
氏周禮各有傳記與春秋共相表裏宜置博士為立  
學官以勵後來 鄭康成傳康成從東郡張恭祖受  
周官禮記所著有答臨孝存周禮難

荀氏悅曰劉歆以周官十六篇為周禮王莽時歆奏以  
為經置博士



隋書經籍志漢時有李氏得周官周官蓋周公所制官

政之法上於河間獻王獨闕冬官一篇獻王購以千

金不得遂取考工記合成六篇奏之

案隋書以考工記獻王所補賈

公彥謂劉歆足成之二說不同

河南維氏杜子春受業於劉歆因以

教授是後馬融作周官傳以授鄭康成康成作周官

注今周官六篇鄭注立於國學

晉書干寶傳寶字令升新蔡人少勤學博覽書記為著

作郎注周易周官凡數十篇行於世

晉書韋逞母宋氏幼喪母其父授以周官音義曰此周公所制經記典誥百官品物皆備於此吾無男汝可受之勿令絕世石季龍時宋氏與夫推鹿車背負父所授書徙冀州書樵采夜則教逞逞遂學成仕苻堅為太常博士盧彞請就宋氏家立講堂置生員百二十人受業周官學復行於世

北魏劉芳傳芳音義明辨撰鄭康成所注周官音千寶所注周官音各一卷周官義證五卷

齊書太祖建元元年襄陽盜發古冢相傳是楚王家獲玉屐玉屏風及竹簡書盜以把火自照後人有得十餘簡者撫軍王僧虔見之云是科斗考工記也

賈氏公彥曰周官漢孝武之時始出祕而不傳馬融傳云秦自孝公以下用商君之法其政酷烈與周官相反故始皇禁挾書特疾惡欲絕滅之搜求焚燒之獨患是以隱藏百年孝武帝始除挾書之律開獻書之路既出於山巖石壁復入於祕府五家之儒莫得見

馬至成帝時劉向子歆校理祕書始得列序著於錄  
略冬官一篇既亡以考工記足之衆儒共排以為非  
是惟歆獨識以為周公致太平之跡具在於斯遭天  
下兵革並起弟子死喪惟里人河南緱氏杜子春尚  
在永平之初年且九十家於南山能通其讀頗識其  
說鄭衆賈逵往受業焉衆逵洪雅博聞又以經書記  
轉相證明為解逵解行於世衆解不行然衆所解說  
近得其實按藝文志云成帝時使謁者陳農求遺書

於天下詔光祿大夫劉向校書經傳諸子詩賦向輒  
條其篇目撮其指意錄而奏之會向卒哀帝復使向  
子歆卒父業歆於是總羣書奏其七略歆之錄在哀  
帝時馬融乃云成帝命劉向子歆攷理秘書始得列  
序著於錄畧者蓋成帝之時劉向父子並被帝命故  
融所傳誤也鄭康成序云世祖以來大中大夫鄭少  
贛名興及子大司農仲師名衆故議郎衛次仲侍中  
賈景伯南郡太守馬季長皆作周禮訓詁二三君子

可謂雅達廣攬者也又謂二鄭同宗大儒摘識周官之義存古字族疑正讀亦信多善徒寡且約用不顯傳於世今讚而辨之庶成此家世所訓也 鄭注周禮時有數本劉向未校之前或在山巖石室有古文攷校後為今文古今不同

鄭氏樵曰漢曰周官江左曰周官禮唐曰周禮推本而言則稱周官者是

以上論周官興廢傳授源流  
今文古文并古今書名不同

綱領下

王氏通曰吾視千載而上聖人在上者未有若周公焉  
其道則一而經制大備後之為政者有所持循矣  
周禮其敵於天命乎

唐太宗問三代損益何者為當徵對曰孔子曰周監於  
二代郁郁乎文哉吾從周周禮周公所裁遺規餘義  
可舉而行若擇前代憲章發明王道臣請以周典惟  
所施行太宗大悅翼日又召徵入曰朕昨夜讀周禮  
真聖作也良久謂徵曰朕思之不井田不封建不肉

刑而欲行周公之道不可得也

張子曰學得周禮他日有為却做得些實事以某且求  
必復田制只得一邑用法若許試其所學則周禮中  
之田制皆可舉行使民相趨如骨肉上之人保之如  
赤子謀人如己謀衆如家則民自信

程子曰王者必奉天建官故天地四時之職歷二帝三  
王未之或改所以百度修而萬物理也至唐猶存其  
略其治時尚得綱紀小正後世官秩殺亂職業廢弛



太平之功所以未至也

范氏祖禹曰天地有四時百官有六職天下萬事盡脩於此如網之在綱裘之挈領雖百世不可易也人君如欲稽古以正名分苟舍周禮未見其可

王氏安石曰道之在政事貴賤有位後先有序多寡有數遲速有時制而用之存乎德推而行之存乎人其人足以任官其官足以行法莫盛乎成周之時其法可施於後世其文有見於載籍莫具於周官之書

呂氏大臨曰周禮直欲無一物不得其所其書無一言而非仁

朱子曰古人立法無所不有天下有是事他便立此一官但只是要不失正耳且如女巫之職掌宮中巫祝之事凡宮中所祝皆在此人如此則便無後世巫蠱之事矣五峯以周禮為非周公致太平之書謂如天官冢宰却管甚宮闈之事其意只是見後世宰相請託宮闈交結近習以為不可殊不知此正人君治

國平天下之本豈可以後世之弊而併廢聖人之良法美意哉

陳氏汲曰周禮雖以設官三百六十為額然職事員數不止於此以天官考之凡卿大夫命士三百五十餘人地官除鄉遂山虞林衡司關司門其數不可考者尚四百餘人春夏秋三官皆五百餘人則六官凡三千人其間必有兼攝者以三公六卿論之如二卿則公一人六卿各掌其職宜若不可兼而成王顧命同

召太保奭芮伯彤伯畢公衛侯毛公則是六卿中召公畢公毛公亦上無三公矣

呂氏祖謙曰周禮一書不見三公之職自家宰以下各領其職所謂作而行之三公朝夕納誨格人主之非心論道經邦便是變理陰陽處大抵人主一心萬化之原使人主識得本原則上而日月星辰無不順下而山川草木莫不寧便是三公之職至三孤則弘大三公之化變理寅亮特有淺深顯微之別耳

陳氏傳良曰周官之綱領三養君德正朝綱均國勢

又曰序官之義有二一則以義類相從如宮正宮伯同主宮中事膳夫庖人外饗同主造食是也一則次叙一官之屬不以尊卑為先後而以緩急為次第故宮正等士官在前內宰等大夫官在後

真氏德秀曰有周公之心然後能行周禮無周公之心而行之則悖矣有周公之學然後能言周禮無周公之學而言之則戾矣公之心禹湯文武之心而其學

則禹湯文武之學也以此之心布而為政以此之學著而為書故能為成周致太平而為萬世開太平也蓋自古禍亂之原略有數端君心縱於逸樂而羣下不敢言也賢才壅於䟽邈而在位非其人也元元愁痛而上不聞蔽於耳目之近而遠勿察也宮闈近侍凡能導人主以侈欲者壹以冢宰統之三公論道師保詔諫而君可立於無過之地矣使民興賢出使長之使民興能入使治之則下無遺賢官無曠事矣居

民有法養民有政斂民有制刑民有典舉天下疫癘  
惇獨無不樂其生者自王畿之近至於六服之遠地  
之相去或千萬里而情之相通如一家凡此皆禹湯  
文武之政公之所思而得者畢萃於書非有公之心  
者其能行非有公之學者其能言乎

李氏叔寶曰古人自抱關擊柝而上皆以下士為之無  
非鄉舉里選德行道藝之人此成周建官之良法美  
意

馬氏端臨曰周禮一書先儒信者半疑者半其所以疑之者特不過病其官冗事多瑣碎而煩擾耳然愚常論之經制至周而詳文物至周而備有一事必有一官無足怪者有如閹閹卜祝各設命官衣膳泉貨俱有司屬自漢以來亦復如此特官名不嚴六典之舊耳固未見其甚異於周也獨與百姓交涉之事則後世惟以簡易濶略為便而以周禮之法行之必至於厲民而階亂王莽之王田市易安石之青苗均輸是



也後之儒者見其效驗如此於是疑其為歆莽之偽書而不可行愚以為未然蓋周禮者三代之法也三代之時則非直周公之聖可行雖中材亦能行之三代而後則非直王莽之矯詐安石之執愎不可行雖賢哲亦不能行其故何也蓋三代之時寰宇悉以封建天子所治不過千里公侯則自百里以至五十里而卿大夫又各有世祿食邑分土而治家傳世守上之人所以治其民者不啻如祖父之於其子孫家主

之於其臧獲田土則少而授老而收於是乎有鄉遂之官又從而視其土壤之肥瘠食指之衆寡而為之斟酌區畫俾之均平

如上地家七人之類

貨財則盈而斂之而

散於是乎有泉府之官又從而補其不給或賒或斂而俾之足用所以養之者如此司徒之任則自鄉大夫州長以至閭胥比長自遂大夫縣正以至里宰鄰長歲終正歲四時孟月皆徵召其民攷其德藝糾其過惡而加以勸懲司馬之任則軍有將師有帥卒有

長四時仲月則有振旅芟舍治兵大閱之法以旗致  
民行其禁令而加以誅賞所以教之者如此上下蓋  
勤勤焉幾無寧日矣然其事雖似繁而不見其為法  
之弊者蓋以私土子人痛癢常相關脈絡常相屬雖  
其時所謂諸侯卿大夫者未必皆賢然既世守其地  
世撫其民則自不容不視為一體故姦弊無由生而  
良法可世守矣自封建變而郡縣為人君者宰制六  
合穹然於其上而所以治其民者則委之百官有司

郡守縣令為守令者率三歲而更雖有龔黃之慈良  
王趙之明敏其始至也茫然如入異境日積月累方  
能諳其土俗而施以政令期月之後善政方可紀纔  
再期而遞代之期已及矣其有疲憊貪鄙之人則視  
其官如逆旅傳舍視其民如飛鴻土梗一切文書不  
過授成於吏手而欲以周官之法行之可乎是以後  
之言善政者必曰事簡所以臨乎其民者未嘗有以  
養之也苟使之無自失其養斯可矣未嘗有以教之

也苟使之無自失其教斯可矣蓋封域既廣則志慮有所不能周長吏數易則設施有所不及竟於是法立而姦生令下而詐起處以簡靜猶或庶幾稍涉繁苛則不勝其瀆亂矣昔子產聽鄭國之政其所施為者曰都鄙有章上下有服田有封洫廬井有伍比俱周官之法也然一年而輿人謗之曰孰殺子產吾其與之三年而後誦之曰子產而死誰其嗣之鄭國土地褊小其在後世則一郡耳以子產之賢智而當一

郡守之任其精神必足以知情偽究得失決不至如後世庸臣俗吏之以苟且從事也周制之在當時亦未盡墮也然稍欲更張則未能遽當於人心必俟摩以日月然後謗讟者轉而為謳歌耳況賢不及子產所蒞不止一郡生乎千載之後先王之制久廢而遺書僅存乃不察時宜不恤人言而必欲行之如王安石者乎蓋累世之私土子人者與民情常親親則利病可以周知故法雖繁而亦足以利民暫焉之承流

宣化者與民情常疏疎則情偽不能洞究故法雖簡而猶懼其病民也是知周禮所載凡法制之瑣碎煩密者可行之於封建之時而不可行之於郡縣之後必知時適變者而後可以語通經學古之說也

朱氏升曰周公六典本以紀官而非以志禮其間所載之禮乃職掌之所及者爾

薛氏瑄曰周禮後世用其制者猶不可易可見為聖人之書

王氏應電曰周官有必不可復者如后妃夫人與尸賓  
獻酢天子與羣侯迎送揖讓之類至官府為一體后  
世子動有式法寓兵於農賓賢能於鄉制馭官寺選  
用府史胥徒鎮撫諸侯四夷後世舍此無以為法

以上

論周官大體及  
行周官得失

問周禮之書有訛缺否程子曰有之周公致治之大法  
亦在其中湏知道者觀之可決是非也

張子曰周禮惟太宰職難看蓋無許大心胸包羅記得



此復忘彼當如捕龍蛇捉虎豹用心力看方可 天  
官之職須襟懷洪大方能包羅統貫規模至大若不  
得其心欲事事上窮究湊合使如是之大必不能也  
朱子曰為學有先後先須理會自家身心合做的學問  
周禮自是後一截事 子升問周禮如何看曰且循  
注疏看去第一要見得聖人公平底意思陳君舉說  
天官之職膳羞衣服皆屬之此是治人主之身此說  
自是到得中間有官属相錯綜處皆謂聖人相防察

之意這便不是天官是正人主之身無統百官地官  
主教民之事大綱已具矣春夏秋冬之官各有所掌  
如太史等官屬之宗伯蓋祝史之事用之祭祀職方  
氏等屬之司馬蓋司馬掌封疆之政最是大行人等  
官屬之司寇難曉蓋儀禮覲禮諸侯行禮既畢出乃  
右肉袒於廟門之東王曰伯父無事歸寧乃邦此所  
謂懷諸侯則天下畏之所以屬之司寇如此等處皆  
是合著如此初非聖人私意大綱要得如此看其間

節目有不可曉處如官職之多與子由所疑三處之

類

案蘓氏轍論周之西都關中東都洛陽皆東西長南北短旬稍縣都如畫棋局無所容之不可信者

一書稱列爵惟五分土惟三子產孟子說皆同孔子亦曰安見方六七十里如五六十年而非邦也者若諸公方五百里諸侯方四百里其勢必有所併必有所徙一公之封而子男之國徙者十有六封數大國而天下盡擾不可信者二一夫受田百畝稅之什一公邑鄉遂無異楚蔦掩町原防井衍沃蓋平川廣澤可井者井之原昇隄防之間狹不可井者町之皆因地以制廣狹多少之異井田溝洫蓋亦然耳非公邑必為井田而鄉遂必為

只得且闕之或謂周公作此書有

未及盡行之者恐亦有此理只如今時法令其間頗

有不曾行者 或問周都豐鎬則王畿之內當有西北之戎如此則稍甸縣都如何其可為也曰周禮一書聖人作為一代之法爾到不可用法處須別有權變之道 周禮中多有說事之綱目者如屬民讀法其法不可知司馬之職乃陳車徒如戰之陳其陳法亦不可見矣 鄭康成考禮名數大有功事事都理會得如漢律令亦皆有注儘有許多精力東漢諸儒煞好盧植也好 康成也可謂大儒 五經中周禮

疏最好詩與禮記次之 擺落傳注須是二程先生  
方始開得口若後學未到此地位便承虛接響容易  
呵叱恐屬僭越氣象不可以不戒 陳徐周禮制度  
講三公宰相處甚詳然皆是自秦漢以下說起蓋他  
不知秦漢諸儒未見孔壁尚書有周官一篇說太師  
太傅太保為三公爾 鄭康成等皆謂劉向所稱經  
禮即周禮三百六十官曲禮即今儀禮冠昏吉凶其  
中事儀三千傳瓚曰周禮三百特官名耳經禮謂冠

昏吉凶蓋以儀禮為經禮也近世括蒼葉夢得曰經  
禮制之凡也曲禮文之目也諸儒之說瓚與葉氏為  
長蓋周禮乃制兵立法設官分職之書於天下事無  
不該攝禮典固在其中而非專為禮設也故班志列  
其經傳之目但曰周官而不曰周禮又況其中或以  
一官兼掌衆禮或以數官通行一事自不應指其官  
目以當禮篇之目

陳氏傅良曰會稽進士夏休著井田譜紹興時表上

之雖泥於數度未必皆協然其意要與時務合不為  
空言去聖人遠周禮一經尚多三代經理遺跡顧以  
解說者繆嘗試者復大繆遂以為終不可用苟得如  
井田譜與近時林勛所著數十家各致其說取其可  
通者則周制可得而考三代之治亦庶幾可復矣

王氏炎曰康成之訓釋可謂有功於周禮然六官制度  
以康成而傳亦以康成而晦一則以緯書汨之一則  
以臆說叅之是以學者不得不疑

魏氏了翁曰康成以漢制解經以賦為口率出泉三代  
安有口賦王介甫用之以誤熙寧皆鄭注啓之

真氏德秀曰鄭賈諸儒析名物辨制度不為無功而聖  
人微旨終莫之覩程子張子論說不過數條獨得聖  
經精微之蘊蓋程張之學周公之學也故能得周公  
之心在上者果能以周公之心行三王之事則太平  
之路開禍亂之源窒豈小補哉

晁氏公武曰唐賈公彥撰周禮疏史稱其發揮鄭學最



為詳明 王安石撰新經周禮義二十二卷所釋經義多以其所創新法傳著之務塞異議者之口耳楊時中立攻安石之書撰周禮辨疑一卷

王氏應電曰非周禮者自臨孝存何休以來不下數十家指摘瑕釁無如胡仁仲之詳著撰數十萬言窮極辨論無如季德明之苦移易周禮者亦不下數十家叅互演繹集成後出莫如舒國裳之備以愚觀之說皆淺陋雖欲自絕於經何損哉

以上論讀周官法并諸家注解得失

擬周官總辨八條

周官晚出東漢以後儒者多排擊謂劉歆附益以佐莽至宋胡氏安國父子則直以為歆所偽為自程朱二子斷為非聖人不能作其論始定而其間決不可信者實有數事焉十一者三代之中正也周官九職貢物之外別無所取於民而載師職則曰近郊十一遠郊二十而三甸稍縣都皆無過十二征之出於市者惟屨布罰布耳其總布則民間賒買之所入也而屨

人職紬布質布別增其二司市職曰以泉府同貨而  
斂賒則周官之法惟有斂有賒明矣所斂不售之貨  
惟民有祭祀喪紀然後得賒冠昏賓燕雖賒不聽也  
而泉府職則曰凡民之貸者以國服為之息夏秋二  
官毆疫禴蟲攻狸蠹去妖鳥毆水蠱所以除民害安  
物生肅禮事也而以戈擊墻以矢射神以牡槀象齒  
殺神則荒誕而不經至於媒氏仲春之月大會男女  
奔者不禁則雖亂國污吏不能布此為憲令也軍刑

之誓大史曰殺小史曰墨三軍之勝敗豈係於交兵之時日淫刑以逞亦不至若是其不情也竊考漢史見歆與其黨頌莽之功曰彛得周禮以明因監而公孫祿數歆之罪則曰顛倒五經使學士疑惑乃以是數者按之莽之亂政則一一相符皆若為之前兆必歆承莽意而增竄之非其舊也因覆按諸職之文削其為與莽事相類者則皆理備而義完其辭氣亦前後相承無間五官之文明白純粹其事皆聖人運用

天理盡精微道中庸俟諸百世而不惑者矣其說具  
詳本職俾尋覽者便焉

司空之篇亾自漢以後無異議晚宋元明諸儒乃分割  
五官以為事典自朱子已辯陳氏傅良之誤謂行人  
宜屬秋官職方宜屬夏官而俞廷椿吳澄乃益鼓其  
無稽之臆說獨不思是經所謂辨方正位體國經野  
正司空之職事也五官之中惟司徒司馬與司空聯  
事而各有專司不可以相代凡大役鄉師帥民徒而

至而興事任力則有司空之辟焉鄉師不得而與也  
古者大役即用卒伍以軍法部勒故大司馬與慮事  
而屬其植受其要然曰與慮事則主其事者惟司空  
明矣而今所謂司空之辟興事安在哉川澮溝洫之  
數遂人量人司險雖與議焉而司空之法所以因山  
導川築防規堰要綰道路以設闕梁時式險易以傳  
衆力者諸官無有也王畿侯國之封疆都鄙之室數  
司徒司馬及其屬雖與議焉而司空之法所以別郊

關之遠近定四民之遊居相城邑之面勢立興作之  
程期者諸官無有也至於郊廟壇壝宮廷朝市官府  
次舍倉府廩庫司空之功作既成而後百官有事焉  
禮樂賓祭之器軍旅農桑之具車旗服物之等司空  
之程式既定而後諸職稟承焉諸儒乃妄割五官以  
為事典徒使五官之職事廢缺不完而於事典之實  
用概乎其未有當也且散見於經者若鄉師所涖之  
匠師儀禮大射之工人士梓人覲禮之嗇夫五官無

列也則別有司空之職而今亡也決矣昔朱子於謂詩序宜遵者終不答蓋惡之深屏之力也故於諸說之謬悠概置而不論云

注釋三禮康成鄭氏之功甚鉅而其過亦不細蓋王安石所以襲迹於新莽而禍宋者多依於鄭氏之說也康成注九賦以為口率出泉注門關市政以舉為官沒其貨注國服為之息曰貸以泉息以泉而安石剥民之政皆託是而為之自康成之注王曰一舉也辭



不別白䟽者以為日舉太牢共百二十饔之醢醢安  
石因之有備物之說自康成以王后世子不會為優  
尊者安石倡之而蔡京童貫王黼恣焉以速北宋之  
亡經義之不明其禍遂至於斯極可不懼哉夫口率  
出泉漢法也周官無是也問師掌國中四郊之賦而  
其職曰任農以耕事貢九穀圃牧工商虞衡嬪婦各  
貢其所有之物則農自九穀以外餘七職自所貢之  
物外別無所謂賦明矣沒民之貨而入於官漢之亂

政也周官無是也春秋傳曰仲尼使舉是禮也以爲多文辭管子曰以時稽師馬牛之肥瘠其老而死者皆舉之則舉乃登諸冊籍之謂爾況質人所稽者書籍所考者度量淳制而曰犯禁者舉而罰之則舉爲登諸冊籍而不可謂沒其貸決矣貸民以財使治產業而計其贏餘以收息者莽之亂政也周官本有賒而無貸康成不能辨而謂貸泉出息一以園廛郊野受田之地爲差是爲國服以誣聖法傳莽事而啓安

石之愚迷不亦悖乎至於王日一舉舉少牢耳醢醢六十壘朔月月半共之以為旬有五日用者耳大司樂職曰王大食三侑則日一舉之為恒食明矣若恒食日舉太牢則朔月月半之大食何以加焉王后之膳服不會飲酒不會膳禽不會以具於大宰羞服之式者品數有常無所用其會耳非縱其欲而不為之限度也至於世子服不敢備則服會飲無常期則飲會膳無加獻則禽會以其有無多少疏數惟王所

命而無常式故也其與王后同者惟朝夕恒膳品味  
有常故無所用其會耳然如此類者在鄭氏賈氏則  
訓釋之疎而在安石則心術隱微之病也安石雖於  
道未有聞焉而於文則晰矣其言祁寒暑雨民猶怨  
咨也舍先王思圖民艱之義而謂民怨不足惜以惑  
主聽而閉民言則其假周官與注疏之說乃明知其  
非而借之以售其術耳是亦不可以無辨也

周官詳於闕市山澤之政世儒以為疑蓋習見莽歆安

石浚民禍世之酷而不知周公運用天理所以開富教之源以正人心而厚禮俗蓋以是為根柢也自市政廢而貨之無當於民用者十三四其作之也以時力是奪民功也其成之也以百材是暴天物也其用之也滋淫侈是敗民德也自山澤不掌於官然後愚民非時妄取不俟其成而竭用之然後盜竊公行有司置而不問由是山彌望而皆童陂塘少遠於宅舍即任其淤墊耗者多而物生之源益隘能無匱乎況

乎商賈籠難致之貨豪民擅山澤之利力過吏勢享  
竝侯王有司因此以鬻法胥吏因此以作姦工非淫  
巧而不羸農遇豐穰而常餒人心日競於奇邪禮俗  
日趨於衰惡皆職此之由也周官之立市政也聯門  
關以譏不物無者使有利者使旱害者使亡靡者使  
微即是四者而所以消游惰備天災厚民俗者備矣  
而且治質劑辨名實屬遊飲食者有禁貴而過市者  
有罰而以息詐偽防黠嫚嚴禮範者周矣凡此者皆

所以養民教民而上則一無所利之也於門征商之  
貨則不征其廛於關市征賈之廛則不征其貨而門  
關之財則以養死政者之老與其孤市之征布則以  
斂不售貨而買者各從其抵則皆以利商賈利萬民  
而上何所利哉周官之掌山林川澤也官為厲禁時  
舍而巡之犯禁者有誅竊木者有刑罰所以禁耗敗  
也斬材之期日官令之財物官領之所以息爭端也  
然守之者官而用之者民雖骨物羽翮草貢葛材之

微猶以當山農澤農之賦而萬民之斲材與受澤物  
之頒者毫末無取焉聖人之心豈不昭昭然若揭日  
月哉至於門關市肆所以不能無征者蓋以九賦任  
萬民有職則有貢無緣偏厚於商賈且懼所得過贏  
而民爭逐末耳如少有利之心則山澤之利豈特  
十百於關市之征哉聖人忠於利民而盡萬物之理  
者後儒宜詳考經文深思其義而毋輕騁臆說也

周官刑典有束矢鈞金之入有盟詛地牲之共世儒多



以為疑不知理與法時有所窮匪是則所以怵姦欺  
靖鬪辯者猶未備也所疑於鈞金束矢者不過曰若  
是則貧民無所赴訴耳夫周官之法自鄉遂公邑都  
家以及門閭市肆凡訟獄皆其地有司聽之又設肺  
石以達惇獨老幼尚慮其無所赴訴乎其造於大司  
寇而求伸者必事久變生如書所稱單辭記所謂有  
旨無簡者耳故曰以兩造禁民訟以兩劑禁民獄則  
所禁乃兩造兩劑之不具者明矣入矢以明直入金

以示信非徒使之重失負也古者議事以制而刑故  
無小故辯法而不信則刑之辟蔽而不信則刑之重  
與之要而非直非信則罪必有加焉所以使之內自  
怵而中止義不克而私服也若兩造兩劑之具備則  
有地治者聽決而立解散之矣若有地治者聽決不  
足以服其心則當赴愬於職聽之士其遲以旬月正  
為此也使職聽者而有枉撓則司寇親聽於外朝羣  
士司刑皆在獄訟者皆得自言其情何為復設入東

矢鈞金然後聽之之法哉至於按之而不得其跡聽之而不得其情不得已而使之詛盟又所以盡五聽之變也臨之以鬼神則其視聽辭色必將有變焉致其地域之衆庶使共其牲衆為之勤而各有出焉則或有知其事而相証者即此事無徵而播其變詐於地域之人他日將不相保受亦姦人所不利也蓋惟聖人智周萬物故能極情偽之變而以濟理法之窮是以易象金矢詩言三物虞夏之前已有詛盟而乃

以是妄議周公之法哉

魏氏了翁在宋儒為明於周官之學嘗論兵賦謂司馬法乃齊穰苴之書而康成以證周官果若所云則井田為厲民之政夫穰苴所述果成周丘乘之政與否今無可考而以甸出長轂一乘為厲民是未講於成周之兵賦也蓋魏氏生南宋之衰習見夫民生之苦病百物之凋殘以為既用其身以備戰守復責其財以共車甲馬牛兵器民何以堪不知以秦漢之後較

之三代以前材物貲產之在官在民國事家財之所  
存所費皆異勢而殊形非通計而實知其分數則贏  
絀之情不可得而見也蓋自井田既廢環海之中十  
九皆隸農耳耕者無田而有田者不耕耕者倍貸以  
具牛種育妻孥而不耕者坐收其歲入之半故耕者  
窮不耕者以其半而出租賦給踐更百役有司多求  
以困之故自貴人富商而外不耕者亦窮若夫成周  
之世則助耕公田之外百畝所入絲粟皆民有也公

旬三日之外暇日皆民所自營也四丘之衆約數百家賦兵之始家出歲入之十一而車甲馬牛兵器旗物應時而立具矣自是以往歲時繕完視始作之費多不過三之一況古者公家無禁利材木取諸山澤絲枲成於婦功所費民財不過金鐵皮草膠漆及工事之齎耳豈若後世百物財用非出泉布以求之於市肆而必不可致哉至於馬牛之畜以供任載以糞田疇又農事所必需而時出之以為師田之用者也

魏氏之學尚為求濟於實用者而為說之鹵莽若此以是知聖人運用天理以濟民物之道不獨非其人不能行亦非其人不能知也

歐陽氏修謂周公設官太多王畿之內計十四萬有奇攻周官者多據此以為不可易夫五官之屬其數具在本自無多修所計者乃鄉遂小吏閭胥鄰長之類耳不知成周之治所以能使天下為一家中國為一人而至於刑措者皆恃比閭族黨州鄉之法以為之

樞紐也蓋治教禮政刑事皆起於二十五家之長黨  
正族師相監之吏即其鄉之人也歲時月吉所布之  
憲即其民之家事也以徵財賦則催科不擾以起徒  
役則呼召立通以相保受則姦宄難容以掌撻罰則  
禁令難犯以證獄訟則欺詐立明以詰盜賊則追胥  
相比其用意尤深遠者以修農功則民可移用以救  
天期地澤之愆而土無遺利以興賢能則與衆共之  
以考德行道藝之實而士無匿情以教禮俗則恩義



可以日深以治兵守則急難可以相死昔朱子讀地  
官司徒之篇而歎成周盛時學校教養德行道藝選  
舉爵祿宿衛征伐師旅田役只為一事其所以能聯  
為一事者則比閭族黨州鄉之法也若修所病於設  
官之多不過謂無祿以給之耳是未察於古之田祿  
與後世異而鄉遂羣士之爵與祿又與王朝之士異  
蓋古有不命之士有無田之士閭胥比長皆耦耕之  
民也以其材力少優故進其爵等以率其曹伍雖曰

中士下士不過如秦漢以還之民爵耳必至族師以上所轄稍衆其事較繁不能躬耕於隴畝然後倍授之田俾任餘夫傭閒民以代耕又其上則再倍焉惟州長遂大夫然後取於所在公田之入以祿之耳何休述井田之法曰凡邑中戶八十則有父老有里正皆倍受田雖所述或哀周之變法而循數推理則成周鄉遂公邑都家之吏祿大略視此矣夫王畿之內提封千里城郭涂巷三分去一而外授田六百六十

萬井雖閭胥之屬盡益以田不足為廣隘而況斷自族師以上哉自比閭族黨州鄉之制廢官與民不相習而法不足以勝姦百事之無統紀皆由於此修不能究其本原而轉以周公之法為疑多見其昧於治體矣

馬氏端臨有言賒貸者

周官有賒而無貸辨見泉府職宜易為斂賒

三代之


時非特周公之聖可行雖中材能行之三代以下非特王莽之矯詐安石之執愎不可行雖賢哲亦不能

行以封建變而為郡縣吏治民情與古懸隔故耳豈  
惟賒貸哉凡事之委曲繁密者皆然一歲之中州長  
讀法者三黨正五族師十有二閭胥則凡聚衆庶皆  
讀焉夫家之衆寡貴賤老幼廢疾以及車輦六畜兵  
器旗物小司徒稽之鄉師稽之鄉大夫登之閭師掌  
之族師校之閭胥數之耕耨有趨女功有稽千里之  
內一事之失宜一民之不率舉可知也由斯道也則  
上下清明衣食可殖禮俗可興然惟古之時治不出

於州黨族間掌地治者即其鄉之民而無府史胥徒則可耳後世行此則呼集奔趨家至戶籍胥役倚法以相威迫而民不得安其居宿其業矣遠行必有節傳近徙必有節授無節傳則不達無節授則園土納之由斯道也則盜賊無所隱逋逃無所之然惟古之時民皆土著遠行者惟國使及商旅近徙者不出其鄉斯可耳後世行此則門關壅閼廬宿莫容行旅怨咨官徒馳驟而日不暇給矣山澤之農即徵其齒角

骨物羽翮絺綌葛材草貢以當邦賦之政令由斯道也則可以寬民力可以阜民財然惟王畿千里四面輻輳計日可達且所徵皆輕細之物斯可耳漢武易之以平準均輸百物皆徵轉運萬里計民所費不啻賦加十五黎民重困其明驗也夫周官之法委曲繁密皆聖人忠於利民之心因時體物而無微不至者也管夷吾治齊一變為簡節疎目而有識者以為得周官之遺意世儒不通時變乃務舉瑣細之法以議

周官皆所謂道聽而塗說耳



欽定周官義疏卷首



欽定四庫全書

經部

欽定周官義疏卷一

詳校官監察御史臣施朝幹

刑部郎中臣許兆椿覆勘

覆校官監丞臣侍朝

校對官主事臣張培

臚錄監生臣阮鍾瑛

欽定四庫全書

欽定周官義疏卷一

天官冢宰第一之一

冢知勇反

惟王建国辨方正位體國經野設官分職以為民極

辨本

亦作辨

平勉反

正義鄭氏康成曰建立也周公作六典之職以授成

王營邑於土中以治天下是為洛邑

賈疏名誥王來紹上帝自服于

土中洛誥周公曰孺子來相宅亂為四方新辟是也案朱子詩傳周公相成王營洛邑為東都以朝諸

侯故曰以  
治天下

司徒職曰日至之景尺有五寸謂之地中

天地之所合也四時之所交也風雨之所會也陰陽之所和也然則百物阜安乃建王國焉辨別也謂別四方考工記匠人建國視日景考極星以正朝夕是也正位謂定宮廟之位書召誥庚戌大保乃以庶殷攻位于洛汭甲寅位成是也 王氏安石曰立宗廟於左立社稷於右立朝於前立市於後謂之正位官言所司之人職言所掌之事設官則官府之六屬分

職則官府之六職也 干氏寶曰體形體 賈氏公

彦曰國謂城中也國外則曰野 黃氏度曰體國以

經理田野 鄭氏衆曰設官分職謂置冢宰司徒宗

伯司馬司寇司空及其屬各有所職而百事舉 朱

子曰極者至極之義標準之名常在物之中央而四

外望之以取正焉者也 鄭氏伯謙曰周公之序六

典也每篇冠以辨方正位體國經野設官分職而終

之以為民極凡此皆所以習民於尊卑等殺階級之

中消其亡等冒上之心而寓其化導整齊之意是以民服事其上而下無覬覦志慮不易視聽純一何往而非為民極哉 葉氏時曰王畿立而根本定方位設而規制嚴國野分而疆理正官職舉而綱目張民於是取正焉

案王城面九里畿內面千里近郊遠郊向稍縣壘之地各有所任人有所宜事取其便皆量國中之體勢以定野外之經制五等之國以次而殺則其野外都

邑郊關溝涂大小遠近必與相稱先鄭及王氏安石  
皆以正位之事為體國誤矣 洪範曰皇建其有極  
又曰惟時厥庶民于汝極錫汝保極元后作民君師  
所以為之極也君奭篇乃悉命汝作汝民極公卿師  
保萬民亦所以為之極也全經之義盡括於此故六  
官之首並揭之俾守典者識焉辨方以正位體國以  
經野設官以分職皆所以安民生定民志而使遵王  
之道故曰以為民極也 朱子以至極之義標準之

名辨書傳以極為中之誤乃從周官看出蓋以為民  
極不可訓以為民中也必兼至極與標準然後以為  
民極建其有極會其有極歸其有極逐字皆得實義  
而了然易明 周官一書為凡帝王之大經大灋故  
首以建國言之義不繫乎國都之何在也注雖指營  
洛為解要不可泥

乃立天官冢宰使帥其屬而掌邦治以佐王均邦國

帥所

聿反治直吏

反下治官同

正義鄭氏康成曰天官象天所立之官天統理萬物

天子立冢宰使掌邦治亦所以總御衆官使不失職

不言司者不主一官之事也

賈疏司徒司馬司空皆云司以其各主一

官不兼羣職春官亦不言司者鬼神非人所主故也

掌主也佐猶助也邦治王

所以治邦國也

鄭氏衆曰爾雅冢大也冢宰大宰

也於百官之職無所不主

蔡氏沈曰冢長也禮有

冢子冢婦之稱故謂大宰為冢宰

賈氏公彥曰宰

者調和膳羞之名冢宰亦能調和衆官故號大宰

王氏



安石曰宰以制割調和為  
事故供刀匕者亦謂之宰

言主治則兼六官五官教

禮政刑事雖不同皆治灋也周官以邦國連言者據  
諸侯也單言邦單言國者多據王國也不言均王國  
而言均邦國者若言王國恐不兼諸侯言邦國則舉  
外可以包內也 干氏寶曰濟其清濁和其剛柔而  
納之中和曰宰

案合教禮政刑事而成治治之使各得其分謂之均  
均者使上下尊卑貧富遠邇各得其平也詩人刺秉

鈞之不善一言以蔽之曰不平其心故相臣佐王平天下自平其政始而平其政自平其心始 冢宰統六官猶仁統四德其職無所不統而大綱有三一曰養君德則自後宮宿衛以及起居服食之節無不與聞所以保護王躬而納之於道以為出治之本也一曰詔廢置政治之要惟在於舉賢絀不肖羣吏則專之卿貳則以詔王而廢置之所以使野無遺賢官無僨事也一曰制國用綜其入出豐凶之數而權衡之

所以使民有常供財不濫費公私充實而有備內外  
謹飭而無邪也以是求之則冢宰所帥諸屬皆可得  
而推矣

辨正賈氏公彥曰注謂大曰邦小曰國據此文邦在  
上國在下故為此解案覲禮同姓大國異姓小邦則  
邦國大小通也

通論賈氏公彥曰總百官則稱冢以天官象天覆萬  
物也大宰職凡邦之小治則冢宰聽之是專國小治

而稱冢也司書職掌六典八灋八則之貳以詔王及  
冢宰是貳王事總衆職而稱冢也宰夫職凡失財用  
物辟名者以官刑詔冢宰而誅之是總衆官誅賞而  
稱冢也司會職以周知四國之治以詔王及冢宰廢  
置是總四國之治而稱冢也 葉氏時曰六卿分配  
天地四時而冢宰以天名官虞書司徒敷典地官之  
職也而典則曰天叙秩宗典禮春官之職也而禮則  
曰天秩五服五章司服典命之職也而曰天命有德

五刑五用司寇之職也而曰天討有罪一則曰亮天工二則曰代天工蓋以無事非奉若天道耳

治官之屬大宰卿一人小宰中大夫二人宰夫下大夫四人上士八人中士十有六人旅下士三十有二人府六人史十有二人胥十有二人徒百有二十人

大宰之大音泰

又如字有音又凡云十有幾者並

同胥思餘反劉思叙反下皆同

正義鄭氏康成曰變冢言大者百官總焉則謂之冢列職於王則稱大冢大之上也山頂曰冢旅衆也下

士治衆事者自大宰至旅下士轉相副貳皆王臣也

王之卿六命其大夫四命

賈疏典命文

士以三命而下為

差

賈疏典命不言鄭氏約之上士三命中士再命下士一命案典命職公之卿三命掌客職士視諸

侯之卿禮注言士以三命而下為差似據此

府治藏史掌書者

賈疏宰夫八職五曰

府掌官契以治藏六曰史掌官書以贊治

凡府史皆其官長所自辟除胥

徒民給徭役者胥讀如譖謂其有才知為什長

賈疏胥有

才知徒給使役故一胥十徒也宰夫八職七曰胥掌官叙以治叙八曰徒掌官令以徵令

王氏

安石曰大宰卿小宰中大夫則卿上大夫也王制諸

侯之上大夫卿蓋非特諸侯也 林氏之奇曰卿爵也冢宰官也 賈氏公彥曰典命大夫同四命而此分為中下若侯伯同七命子男同五命而爵則有高下也府史胥徒並庶人在官者王制下士視上農夫食九人祿足以代耕則府食八人史食七人胥食六人徒食五人 王氏詳說曰府一而史倍胥一而徒十此例之常也 陳氏傳良曰古之用人無他途自公卿大夫子弟皆養於學宮或備宿衛以考其德行

而升進之自鄉遂都鄙侯國凡占名數而為民者亦  
考察於鄉里擇其秀異者節級而升之故受命為士  
其次者則任以府史之職蓋其職任稍重非胥徒之  
比 鄭氏伯謙曰府史胥徒可賦田則授之田不可  
賦田則給之祿以百畝為差孟子曰祿足以代其耕  
也

通論呂氏祖謙曰案顧命大保領冢宰畢公領司馬  
毛公領司空別有芮伯為司徒彤伯為宗伯衛侯為



司寇則三公兼六卿周制也 賈氏公彥曰府史大

例皆府少而史多府在史上唯御史史百有二十人

特多而在府上以掌贊書數多也天府府多於史以

所藏物重也

案掌次鬱人司尊彝司几筵司服磬師典庸器諸職皆府多於史不獨天府

有府兼有史以當職事繁也有史而無府以當職事

少得史即足故也角人羽人等直有府無史以當職

文書少而有稅物須藏也食醫等府史胥徒俱無者

以專官行事更無所須也一胥例十徒腊人之類有

徒無胥者得徒則足不假長帥也 王氏昭禹曰有

藏則置府有書則置史有號令之事則置徒有徒則置胥有市賈之事則置賈

餘論范氏祖禹曰古者惟任一相以治天下唐虞有百揆夏商可知也周之冢宰實總六卿詔王廢置是以治出於一政有所統後世宰相之職分而不一君以為權在於己臣以為政在於君國之治亂民之休戚無所任責故賢者不得行其所學不肖者得以苟

容其間由官不正任不專也 陳氏友仁曰官制云  
天地春秋四官自卿至旅下士凡六十三人而府史  
胥徒止百五十人蓋吏役如是足也吏省則祿易給  
有祿則知自愛漢猶倣此意佐史有斗食之秩長安  
游徼吏有百石之秩左馮翊有二百石卒史張敞為  
膠東相吏追捕有功者得一切比三輔尤異自是以  
後百石吏皆差自重賢人君子往往出其間自鄉差  
之法變為顧役天下之事付之游手之民又從而奪

其庸是教之為姦而又授以具也上自朝廷下至州縣每一司官長不過數人而胥吏不勝其衆則官之不勝吏姦宜矣天下何從而治哉 王氏志長曰周制下士與庶人在官者同祿官與吏無甚分也西漢去古未遠蕭曹以刀筆吏佐命為元勲故西都之公卿大夫多出胥吏而儒雅賢厚之人亦多發迹於吏博士弟子之明經者多補太守卒史東漢流品漸分然胡廣為郡散吏袁安世傳易學為縣功曹應奉讀

書五行並下而為郡決曹吏王充徐穉皆為從事功  
曹而不以為屈無他始有祿以養其廉而後有功名  
之途以盡其用也然則周官之史胥不以卑冗限其  
終身可知矣後世不為之謀其生而但抑其格則犯  
科為姦不自愛重者十人而九此亦為之長者之過  
也

存疑王氏與之曰列國大夫稱卿僭也春秋一經無  
卿字凡傳稱卿者經皆稱大夫蓋因周官小宰小司

徒等皆中大夫遂以卿為上大夫故引王制諸侯上大夫卿及晏嬰之言以證之不知王制乃漢人所述晏嬰謂侯國之大夫乃王朝之士惟卿為大夫耳

案五官之貳皆中大夫則卿為上大夫明矣晏嬰所云別為一義不足以破王制

宮正上士二人中士四人下士八人府二人史四人胥四人徒四十人

正義鄭氏康成曰正長也宮正主宮中官之長

陳氏友仁

曰官制云宮正王  
宮宿衛官之長

王氏與之曰書顧命召伯為冢

宰命仲桓南宮毛俾爰齊侯呂伋以虎賁逆子釗蓋  
宰臣統宿衛此最有意 王氏應電曰以分職言宮  
正掌宮中官府宮伯掌宿衛士庶子以兼職言則宮  
正總王宮之戒令糾禁宮伯亦隸之

通論賈氏公彥曰凡六官序官之灋有二一則以義  
類相從若宮正宮伯同主宮中事膳夫庖人內外饗  
同主造食事故連類序之二則不以官之尊卑為先

後皆以緩急為次序故宮正以士官在前內宰等大  
夫官在後也 諸官言伯者長也宗伯之類言師者  
取可師法也樂師之類稱人者以其事名官獸人獻  
人之類稱氏者有二義族有世業則以氏名官若攷  
工記桃氏為劍築氏為削是也官有世功則有官族  
若師氏保氏馮相氏保章氏是也司裘司市之類言  
司者專任其事也典婦功典絲枲之類言典者課作  
由已也諸稱職者若職內職歲不掌受藏主其業而



已凡云掌者有三義一者他官共物已暫掌之若幕人共帷幕幄帟掌次張之也二者掌徵斂之官若掌皮掌染草之類三者所掌非已所為則掌固掌疆之類脩其廢壞而已自外皆逐事立名以義詮之可曉也 干氏寶曰言司者總其領司會之屬言師者訓其徒向師之屬言職者主其業職內之屬言衡者平其政虞衡之屬言掌者主其事掌舍之屬言氏者世其官師氏之屬言人者稱其材庖人之屬不氏不人

因事以立名也宮正膳夫內外饗之屬葉氏時曰說者多言宮正掌兵衛宮伯掌郎衛愚竊以為不然宮正宮伯所掌皆郎衛也蓋天子之衛有二而其別有四官府次舍在宮中有故而令宿者宮正掌之卿大夫士之嫡子庶子入衛王室者宮伯掌之眡朝則司士正其儀大事則諸子掌其政此入直環列之衛也王眡朝則前正位而退王出入則自左馭而前驅眡朝則在路門之左大僕掌之而小臣御僕屬焉此

僕從侍御之衛也凡此皆非兵也虎士八百人先後王而趨以卒伍居則守王宮舍則守王閑胝朝則在路門之右虎賁氏掌之而旅賁氏屬焉此奔趨擁護之衛也居虎門之左使其屬帥四夷之隸各以其兵服守王之門外師氏掌之帥四翟之隸使服其邦之服執其邦之兵以守王宮司隸掌之此周防守禦之衛也二者則皆兵也

餘論陳氏祥道曰宮正掌王宮之官府宮伯掌王宮

之士庶子宮正稽其功緒糾其德行教之道藝而宮  
伯掌其政令誅賞使學問日進職業日脩則王宮之  
宿衛無非直諒多聞之士秦有郎中令掌宮殿門戶  
漢武帝更名光祿勳其屬有議郎中郎侍郎郎中凡  
四等謂之三署郎類取經明行脩者充之至於公車  
特起賢良方正公府掾曹試博士者多在此選故劉  
向霍光張安世東方朔揚雄之徒皆出焉是以董仲  
舒欲使列侯郡守二千石各擇其吏民之賢者歲貢

二人以給宿衛且以觀大臣之能猶得周官遺意

宮伯中士二人下士四人府一人史二人胥二人徒二十人

正義鄭氏康成曰伯長也 魏氏校曰宮正宮伯相為長貳先王燕居宮中宦寺婦人皆不得在側前後左右所與居者惟士耳

餘論陳氏傳良曰環衛有二項其一是公卿大夫之子弟分置八隅宮伯領之一是凡宮中官府之徒役

錯置於士庶子八次八舍之間宮正領之皆屬冢宰  
宮伯所掌在漢時為郎衛屬郎中令宮正所掌在漢  
時為兵衛屬衛尉然光祿勳掌典謁署郎而大尉部  
之則亦隸於三公但以文屬無所徵令於其間也至  
武侯相蜀深慮宮中府中不為一體則當時宮府判  
矣

案宮正所掌非兵衛葉氏時已論之兩漢法亦屢更  
未可以漢制即為周制至諸葛所云宮府一體者則

以陟黜臧否之異同而言非指官吏之統轄也

膳夫上士二人中士四人下士八人府二人史四人胥

十有二人徒百有二十人

膳市  
演反

正義鄭氏康成曰膳之言善也今時美物曰珍膳膳  
夫食官之長也鄭司農云詩曰仲允膳夫邱氏濬  
曰膳夫以下庖饗亨人等官皆以士為之而屬之冢  
宰以人君一身宗廟社稷之所關飲食不可輕也

庖人中士四人下士八人府二人史四人賈八人胥四

人徒四十人

庖蒲肴反賈音  
嫁徐音古下同

正義鄭氏康成曰賈主市買知物賈

存疑鄭氏康成曰庖之言包也裹肉曰苞苴

案古民茹毛飲血包犧氏始炙肉為毛炮庖之義宜  
取於此若包則茅匭橘柚皆有是名注義似偏

內饗中士四人下士八人府二人史四人胥十人徒百

人

饗於胃  
反下同

正義鄭氏康成曰饗割烹煎和之稱內饗所主在內



賈氏公彥曰饗和也熟食須調和故曰饗

外饗中士四人下士八人府二人史四人胥十人徒百  
人

正義鄭氏康成曰外饗所主在外

亨人下士四人府一人史二人胥五人徒五十人

亨晉  
庚反

正義鄭氏康成曰主為內外饗煮肉者 魏氏校曰

今之厨役古乃以士為之事外無道也後世士多清  
談鼎鑊之事以為賤役事道判矣讀周禮者以此類

求之庶知古人溫恭朝夕執事有恪之義

總論朱子曰陳君舉說天官之職如膳羞衣服之官皆屬之此是治人主之身此說是

甸師下士二人府一人史二人胥三十人徒三百人

甸師

反硯

正義鄭氏康成曰郊外曰甸師猶長也甸師主共野物官之長 賈氏公彥曰天子藉田在甸故稱甸師此官主地事不在地官者以其共野薦給薪蒸故次

亨人 王氏安石曰徒三百人為其以薪蒸役内外  
饗之事非特耕耨王藉也

獸人中士四人下士八人府二人史四人胥四人徒四  
十人

正義賈氏公彥曰掌畧田獸以共膳羞故在此

鰕人中士二人下士四人府二人史四人胥三十人徒

三百人

鰕音魚本又作  
魚亦作鰕同

正義馬氏融曰徒三百人者池塞苑囿取魚處多故

也

鼈人下士四人府二人史二人徒十有六人

鼈卑列反

正義鄭氏鍔曰龜蜃之類莫不有甲名官特以鼈者蓋龜以卜蜃以飾器不專於食有甲之美而食之者衆無如鼈

腊人下士四人府二人史二人徒二十人

腊音昔

正義鄭氏康成曰腊之言夕也

賈疏乾曰腊朝曝夕乃乾故云腊之言夕

或作久久乃乾成也

王氏應電曰昔古作簪上即

疊內從日乾之今文旁加月腊人主凡乾肉以火乾

者亦名

曰腊

醫師上士二人下士四人府二人史二人徒二十人

醫乙

熙反

正義鄭氏康成曰醫師衆醫之長 賈氏公彥曰醫

有齊和飲食之類故設在飲食之間 黃氏度曰春

秋傳晉侯有疾秦醫和謂趙孟曰國之大臣榮其寵

祿任其大政有菑禍興而無改焉必受其咎今君至

於淫以生疾主不能禦是以云良臣將死也冢宰王

躬是保燥濕寒暑起居飲食皆當體察故醫師屬焉  
王氏安石曰醫師聚毒藥以共醫事故有府以藏  
使醫分治疾瘍稽其事制其食且有政令故有史以  
書有徒以役諸醫受政令於醫師聽所使令則無用  
府史胥徒

餘論葉氏時曰人君起居飲食不知致謹皆足以生  
疾統於大臣則小臣有所忌而不敢導君之欲西漢  
以大醫大官隸少府而統於丞相御史猶有周官遺

意至東漢則悉用奄人主之起居飲食之重不揆於大臣而委之奄豎豈防微杜漸葆和毓德之道耶

食醫中士二人

食如字

正義鄭氏康成曰食有和齊藥之類 王氏昭禹曰易之頤君子以節飲食蓋氣體不和多由於飲食於無事之時而順適之有道疾病何自至哉此食醫所以設也

疾醫中士八人

正義陳氏傳良曰疾醫專治內證 王氏應電曰食  
醫以王為主疾醫以萬民為言但大人治於未病而  
其法亦通乎下小人治於已病而其法亦通乎上  
通論鄭氏伯謙曰執技以事上者惟醫術為難精故  
食醫之下有疾醫調飲食不兼治病也疾醫之下有  
瘍醫察內證不兼外證也瘍醫之下有獸醫治禽獸  
者不兼治人也

瘍醫下士八人

瘍音羊



正義鄭氏康成曰瘍創癰也

賈氏公彥曰曲禮頭

有創則沐身有瘍則浴

獸醫下士四人

正義鄭氏康成曰獸牛馬之類

賈疏爾雅在野曰獸在家曰畜又云兩足

而羽謂之禽四足而毛謂之獸既不別釋畜則獸可以兼牛馬

王氏應電曰家畜

之獸惟牛馬為貴其疾當有以治之故有獸醫

酒正中士四人下士八人府二人史八人胥八人徒八

十人

正義鄭氏康成曰酒正酒官之長

賈疏與下酒人漿人為長不言漿文

畧也

賈氏公彥曰酒漿之職與膳食相將故在此

通論陳氏汲曰酒正不掌酒禁而地官司醴禁飲食於市者秋官萍氏掌幾酒謹酒蓋酒正掌王朝之政令無暇及外事必付之刑官市官之屬然後職專而事便也

酒人奄十人女酒三十人奚三百人

奄衣詹反又於檢反劉於驗反奚如

字又胡禮反

正義鄭氏康成曰奄精氣閉藏者今謂之宦人 賈氏公彥曰以與女酒及奚同職故用奄不稱士亦府史之類女酒則與奚為什長若胥徒奚三百人造酒須人多也女之有才智而曉酒者為女酒其給使者為奚

案酒漿籩醢醢鹽羃七職皆出入王宮故以奄奚為之以給世婦廟中之役故酒人用奄

辨正王氏應電曰女酒女漿之類皆擇民間婦女善

其事者以供職其次為奚如庶人在官者故內宰云分其人民以居之也寺人職稱掌王之內人及女宮之戒令內人指女御故係之於王女宮則凡女酒女漿若奚之屬存焉故不係之於王也注以女奚為女奴非也秋官司厲明言盜賊之女子入於春豪則不共他事明矣春事煩勞而女春枕二人奚五人以執役者女奴也饅事精潔女奴不與故設奚至四十人如以奚為女奴豈春事之煩而五人能盡之饅事較

簡而反有四十人之多乎且以王及后之至尊祭祀賓客之至潔而飯食乃造於盜賊之女子無是理矣

漿人奄五人女漿十有五人奚百有五十人

漿子良反

通論王氏昭禹曰酒漿造釀異法故異職也 金氏

瑤曰漿之制與酒畧同酒用釀漿不用釀

凌人下士二人府二人史二人胥八人徒八十人

凌吏應反

字從冰或力升反

正義鄭氏康成曰凌冰室也詩云二之日鑿冰冲冲

三之日納于凌陰 賈氏公彥曰其職云凡外內饗  
之膳羞鑑焉故連類在此

籩人奄一人女籩十人奚二十人

正義鄭氏康成曰籩竹器如豆者其實容四升

醯人奄一人女醯二十人奚四十人

醯呼  
改反

正義鄭氏康成曰醯豆實也不謂之豆人者此主醯

豆不盡於醯也

賈疏豆有腳腫腕截炙膾之屬其數  
甚多若言豆人恐竝掌之此惟掌醯

而已豆以木為之受四升

案有籩人而無豆人者籩實果穀魚鹽餌饗皆易成  
故統於一官豆實醢物醢物雜而難成非一官所能  
共而豆實不盡於醢醢之物也鹽亦籩實而別列一  
職者共百事之鹽籩實其一耳 籩人女奚少以棗  
栗之屬皆乾物也醢人醢人女奚倍之以菹醢之屬  
皆濡物製作事繁也

通論賈氏公彥曰天子豆百有二十上公四十侯伯  
三十有二子男二十有四上大夫二十下大夫十有

六

醯人奄二人女醯二十人奚四十人

醯本又作醢呼西反

通論賈氏公彥曰齊蒞必須醢物乃成則與醢人職通故次其後

鹽人奄二人女鹽二十人奚四十人

正義賈氏公彥曰鹽所以調和上食之物故連類在此

案周官不言鹽賦以產鹽之區皆非畿內也鹽利至



重若任民為之爭奪必多矣太公治齊官山府海則  
設官治之而收其利可知或謂聽民自取而無賦恐  
非治理之平也

冪人奄一人女冪十人奚二十人

冪莫  
繹反

正義鄭氏康成曰以巾覆物曰冪 賈氏公彥曰巾  
冪所以覆飲食之物故次飲食後

宮人中士四人下士八人府二人史四人胥八人徒八  
十人

正義賈氏公彥曰宮人主安息王身故在此 陳氏  
友仁曰官制云宮人居舍官之長 此下四官是王  
之寢處供帳安息王身之事

掌舍下士四人府二人史四人徒四十人

正義鄭氏康成曰舍行所解止之處

賈疏解脫止息之處

幕人下士一人府二人史二人徒四十人

幕模鄂反

正義鄭氏康成曰幕帷覆上者

掌次下士四人府四人史二人徒八十人

正義鄭氏康成曰次自脩止之處 賈氏公彥曰案其職云掌王次之灋以待張事幕人共之掌次張之故連類在此 自掌舍至掌次皆王在行之事 鄭氏鍔曰舍者久留之辭次者暫止之義出而會同則或留之久故有掌舍以為衛出而祭祀暫止而已故有掌次以為儀觀其設桎杻壇壝嚴為防限則久留可知觀其設皇邸帟案多為容飾則暫止可知

大府下大夫二人上士四人下士八人府四人史八人

賈十有六人胥八人徒八十人

大府之大音泰又如字

正義鄭氏康成曰大府為王治藏之長若今司農

賈氏公彥曰有賈者府官有市買須知物貨善惡也

李氏覲曰周官掌財者雖不一綱統所係實專於

一司故天下財貨之入莫不自大府受之量入以為

出亦莫不自大府頒之是以利權不分而斂散得宜

使不專總於一司出財者惟以給辦為先用財者惟

以濟事為功而後之不繼不恤也財如之何不虧

通論周禮菁華曰大府以下諸職皆出納會計有司  
故隸於冢宰以制國用也惟冢宰以道佐人主上得  
以約王后世子之過取下得以制有司之擅供凡事  
皆有定式大府但稟成式而頒之則侈心溢志不戒  
自抑所以常有三十年之通而民無凶荒水旱之患  
也

玉府上士二人中士四人府二人史二人工八人賈八  
人胥四人徒四十有八人

正義鄭氏康成曰工能攻玉者 賈氏公彥曰其職云掌王之金玉玩好兵器凡良貨賄之藏以玉為主故名玉府有賈使辨玉之善惡貴賤也

餘論陳氏傅良曰玉府掌天子器用財賄燕私之物而列於大府之下與凡治藏之官無異則日有成月有要歲有會司會有廢置誅賞之典夫安得不節若御府禁錢捐之親幸之手藏諸省闥之中外人比校不及則傷財害民豈細故哉 葉氏時曰以諸職考

之獸人之皮毛筋角獻人之獻征廛人屠者之皮角  
筋骨遂師之野職野賦澤虞之財物以入玉府而共  
玩好賜予之用非天子之私藏也漢初以大司農給  
國家公用以少府給天子供養元帝時賈捐之言暴  
師未一年費四十餘萬大司農錢盡乃以少府禁錢  
續之是猶以私藏為公用也自光武出少府禁錢屬  
司農宮中私用一切於司農取之章和以後以其不  
便遂於宮中自立一監命奄人主之而古制始廢矣

內府中士二人府一人史二人徒十人

正義鄭氏康成曰內府主良貨賄藏在內者 王氏  
與之曰曰內府非天子私藏之所以其在庫門內耳  
與後世瓊林大盈異矣

案諸府皆非私藏王氏以其名曰內府嫌於私也故  
辨之然以為在庫門內則未必然王者之財不必置  
之門內而後為內也三府特以其所藏之物為別耳  
要當在王宮之外內府掌受九貢九賦九功之貨賄



此皆生於天時產於地利成於民力所謂財用之大源下之所以共上也外府掌邦布之入出以馭輕重以均貴賤以通有無所謂財用之大權上之所以制下也自外而藏諸內故曰內府自內而布諸外故曰外府

通論鄭氏伯謙曰玉府內府所掌金玉兵器凡良貨賄一也必分而為二官者玉府所掌皆式貢餘財所作及獸人獻人所入專共王玩好賜予邦之大用不

與焉內府所掌乃九貢九功之貨賄及諸侯所獻國珍皆以共邦之大用故不可不分為二也

外府中士二人府一人史二人徒十人

正義鄭氏康成曰外府主泉藏在外者

賈疏對內府為外

賈氏公彥曰其職云掌邦布之出入以共百事故在此

司會中大夫二人下大夫四人上士八人中士十有六人府四人史八人胥五人徒五十人

會古外反凡要會會計之字皆放此

正義鄭氏康成曰會大計也

賈疏宰夫職曰計曰成月計曰要歲計曰會故

會為大計

司會主天下之大計計官之長若今尚書王

氏應電曰司會執典濬則之貳贊王及冢宰以均平天下操日成月要歲會之總以詔王及冢宰廢置總贊天下之治會百官之政其權亞於大宰不止財用一事故其職隆而位尊也

案有謂大府下大夫而司會以中大夫為之屬者非也大府之屬玉府內府外府以及官府都鄙之吏皆

主守藏者用財之式灋則司會鈎攷之故司書職歲  
職幣皆屬司會而職內亦屬焉知所入然後可量以  
為出也司裘掌皮亦以類而相從其出用之數亦待  
攷於司會也天府所掌惟貨財之守藏則以下大夫  
領之足矣司會掌邦之六典八灋八則之貳以逆邦  
國都鄙官府之治掌九貢九賦九式九功之灋以均  
節財用凡冢宰所布之治皆攷焉於內則逆羣吏之  
治於外則周知四國之治以詔王及冢宰廢置凡王

及冢宰所以馭百官者皆與議焉其爵與小宰竝而  
職事繁重轉過於小宰故特設下大夫四人以佐之  
正朱子所謂運用天理不得不然者後人以私意隱  
度謂欲其權足以制大府然後鈎攷糾察之勢得行  
悖矣

餘論陳氏傳良曰成周司會之職屬於冢宰凡外內  
府之財用皆制焉職專而任重漢初蕭何領天下財  
賦以張蒼為計相猶得此意其後諸府各自置官如

大尉之金曹自主貨幣鹽鐵倉曹自主倉穀則其事分其權輕矣至本朝則周之三府分而為四凡天下金玉之物皆歸奉宸庫山澤鹽鐵之賦皆歸內藏其他所入一歸之南庫至天下戶口租入則歸之戶部權不歸一所以漫不可攷雖曰宰相兼制國用而無以權出入之通

司書上士二人中士四人府二人史四人徒八人

正義鄭氏康成曰司書主會計之簿書

賈疏古有簡策以記事後

代用簿則  
簿書也

鄭氏鏐曰百官有司財用之數具載於

司書司會得以按籍而稽故次其後

職內上士二人中士四人府四人史四人徒二十人

內音

納

正義鄭氏康成曰職內主入也

職歲上士四人中士八人府四人史八人徒二十人

正義鄭氏康成曰主歲計以歲斷

鄧氏元錫曰制國  
用以歲為斷也

案不曰職出而曰職歲者歲有豐凶所出一以歲為

準而不得過也

通論王氏應電曰職內主入職歲主出各有司則專互相勘則覈入以時其數簡故官吏省出以漸其數繁故官更多也

職幣上士二人中士四人府二人史四人賈四人胥二人徒二十人

正義鄭氏伯謙曰職幣掌幣餘之賦者 賈氏公彥曰其職云掌式灋以斂官府都鄙與凡用邦財者之



幣以待上之賜予與職歲通職故連類在此

存異賈氏公彥曰此三職皆有府義不得名府者以財不久停也

司裘中士二人下士四人府二人史四人徒四十人  
正義賈氏公彥曰此職并掌皮亦有府義故在此  
禮庫曰皮革亦財賦也故屬大府

掌皮下士四人府二人史四人徒四十人

正義陳氏傅良曰古者禮贄皆以皮幣為主出入之

數大較與貨賄相敵故亦屬於大宰皆司會為之長  
內宰下大夫二人上士四人中士八人府四人史八人  
胥八人徒八十人

正義鄭氏康成曰內宰宮中官之長 賈氏公彥曰

名內宰者對大宰治百官大宰不稱外者兼統內也

鄭氏伯謙曰內宰為冢宰之屬則女寵近習皆畏  
師保之檢察而無敢踰節皇父作相膳夫內史皆不  
得人晉侯近女而惑疾醫和以為趙孟之過古人致

君二南之化其道由此 朱子曰五峯以周禮為非  
周公致大平之書謂如天官冢宰却管甚宮闈之事  
其意只是見後世宰相請託宮闈交結近侍以為不  
可殊不知此正人君治國平天下之本豈可以後世  
之弊而併廢聖人之良法美意哉

餘論鄭氏伯謙曰漢大長秋為后卿蓋內宰之意中  
宮僕謁尚書黃門冗從如小臣之屬內府令如內司  
服之屬皆領焉若中常侍與凡侍內掖庭暴室御府

祠祀者與勾盾中藏府令丞典掌貴人采女官婢侍史服食游觀諸事皆少府統焉職分既分不相干涉然大長秋中常侍猶參用士人鄧通為文帝幸臣而丞相申屠嘉得檄召欲斬之自東京悉用宦者士大夫既無復與聞內事而隸少府者徒以文相屬故大尉楊秉糾中常侍尚書詰以三公統外越分奏近臣蓋三府之令不行於便嬖况后妃乎然前漢大長秋士大夫也猶可以節制後宮成帝勅許后減省用度

后上書辨論恐官吏以詔書繩之猶有周家氣象後漢雖改用宦官而宮中財用尚付之有司章和以後不復領於外朝及隋置殿中監唐置內諸司凡天子服食器用一切付之奄人大臣不敢問則成周設官之意無復存者矣 王氏與之曰宮中官不過三項宮正宮伯宿衛之官今之環衛是也宮人掌王寢灑掃次舍之事今之脩內司是也至於內宰凡宮中之奄豎與諸嬪御皆在所統則今之入內內侍省都知

是也內宰所統事繁體甚尊重故以下大夫為之其屬無下士與諸職不同

內小臣奄上士四人史二人徒八人

正義鄭氏康成曰奄稱士者異其賢 賈氏公彥曰

其職云掌王后之命正其服位案夏官大僕職出入王之大命正其服位則此小臣侍后職與大僕侍王同酒人漿人等奄竝不稱士此則以有賢行而命為士也 呂氏祖謙曰奄位極於上士先王防患之意

蓋微 李氏觀曰餘奄皆不命也宦官之位列天象  
蓋帷簿之內牀第之言固不可以屈辱俊乂混淆男  
女其用奄人乃制事之宜然先王不以恩奪義不以  
私廢公雖其褻臣無得過寵奄稱士者止於四人况  
可為卿大夫哉 雜說后之尊亞於王掌其命者四  
人而已六寢六宮之奄寺內豎不過二十人嚴矣哉  
餘論陳氏傳良曰極治之世無他人主親近端人正  
士不使小人在側而已如閹寺褻近易為人主所寵

任屬之冢宰則人主不得以私意暱內臣不得以非道干此先王治內之嚴也西漢制猶近古三公總九卿而少府之官凡內臣皆屬焉自武帝疎遠朝士宰相不得檢攝內治其權稍輕矣既而石顯用事匡衡甄譚猶得條奏具言舊惡則宰相雖無曩時之權而宰制之意猶故也當時侍御亦參選明經之士咸拜議郎更宿王宮以備顧問東漢則議郎不在宿直中常侍不復雜調他官皆宦者為之卒至王爵天憲皆



歸奄寺孫程曹騰得專廢立原其所自蓋由三公徒擁虛位而宦者之專權非所能制故也

閤人王宮每門四人圍游亦如之

閤音昏圍音又游本亦作旂音由

正義鄭氏康成曰閤人司昏晨以啓閉者圍御苑游離宮也 賈氏公彥曰其職云掌守中門之禁言中

門則唯雉門耳而言每門者彼言中門據有禁守者言之其實王之五門皆使閤人守之 王氏昭禹曰門守尤宜謹於昏故曰閤人

存疑鄭氏康成曰墨者使守門

案內則深宮固門閤寺守之穀梁傳亦云閤寺人也  
此列叙羣奄不宜獨為墨者墨者所守蓋城郭官府  
館舍倉廩廡庫之門王宮五門六服羣辟朝會公卿  
百官所出入未必使黥者守之也

寺人王之正內五人

寺石  
異反

正義鄭氏康成曰寺之言侍也詩云寺人孟子正內  
路寢賈氏公彥曰僖二十四年左傳寺人披自稱

刑臣則寺人奄人也正內謂后之路寢若王之路寢  
不得稱內內宰注后象王立六宮而居之亦正寢一  
燕寢五則正寢路寢也

案諸職稱奄言其精氣之閉藏而已惟王之正內謂  
之寺人言能侍御於王故別之以示重也不曰后  
之路寢而曰王之正內婦人所居必繫於夫以為名  
猶內宰職不曰后宫而曰王之北宮也后寢設寺人  
而王寢無之何也王之路寢與公卿聽政即釋服而

居燕寢自夕以脩令之前侍御僕從皆在焉惟夜以安身然後嬪婦叙御耳宮人職共寢中之事謂共具也內小臣掌陰事謂嬪婦入御之事也寺人掌內人及女宮之戒令相道其出入則內人入御女宮隨而聽事具在其中矣自朝及夕侍王皆士大夫夜事則內小臣寺人當直者遞代而掌之故員無別設耳通論朱子曰天宮兼嬪御宦官飲食之人皆總之則其於飲食男女之欲所以制其君而成其德者至矣

豈復有後世宦官之弊古者宰相之任如此

餘論賈氏公彥曰據此則寺人不掌男子秦詩未見君子寺人之令蓋秦仲始大其官未備故寺人兼小臣得掌男子石氏守道曰周官閹人掌守王宮中門之禁而已寺人掌王宮之內人及女宮之戒令而已漢武帝數宴後庭潛遊離館奏請機事多以宦官主之始預政焉巧倖進而正人廢諛佞入而君德敗亂是以生

內豎倍寺人之數

豎蜀羽反

正義鄭氏康成曰豎未冠者之官名

賈氏公彥曰

昭四年左傳叔孫穆子宿於庚宗庚宗之婦人生牛  
以為豎則當為童子未冠者

案文王世子至於寢門外問內豎之御者以侍正內  
也左傳渾良夫少為孔氏之豎則豎非奄可知

存疑劉氏彝曰內豎奄之小者

九嬪

嬪皮因反  
先鄭音賓

正義鄭氏康成曰嬪婦也昏義古者天子后立六宮  
三夫人九嬪二十七世婦八十一御妻以聽天下之  
內治以明章婦順不列夫人者夫人之於后猶三公  
之於王坐而論婦禮無官職 陳氏傳良曰自九嬪  
至女史皆屬天官先王之意深矣彼婦人女子而當  
於至尊幽居九重則驕蹇自恣無所不至也惟使之  
分職於內而附屬於外有職則當奉其法有屬則必  
考其功奉法則不敢不謹考功則不敢不勤況內宰

則用大夫士春官世婦每宮卿二人皆分命賢婦人以叅檢內事能無畏忌哉漢高欲廢太子立戚夫人子如意留侯曰骨肉之間雖臣等百人何益冢宰失職之弊也

總論薛氏衡曰內宰所掌自內豎以上所以紀綱王宮之治自九嬪以下所以輔成王內之治

世婦

正義鄭氏康成曰不言數者君子不苟於色有婦德



者充之無則闕 賈氏公彥曰九嬪言數者欲見世  
婦女御有德亦充若九嬪無德亦與世婦女御同闕  
故互其文令得兩見耳

案鄭康成三夫人九嬪世婦女御注本確不可易其  
引昏義以證世婦女御之數及家語當夕之說宋以  
後諸儒紛然排擊皆於理有未達也天子法天凡事  
皆以十二為度故有三夫人九嬪魯伯姬歸於宋三  
國來媵春秋特書以為非禮則天子宜備十二之數

明矣三夫人雖不見於經而酒正有后致飲於賓客之禮漿人又有夫人致飲於賓客之禮則后之下有夫人明矣此猶三公不見於經而其朝位則見於小司寇朝士射位則見於射人耳蓋惟九嬪如九卿之不可缺三夫人則有其德乃備其位猶三公之官不必備惟其人也世婦則有子而可以為王繼世者其無子而賢德出衆者或附焉女御則良家子賅姓於王宮王所幸御乃有其位故其數皆不可定也至王

所未御必有限年出嫁之制而今不可考矣 古者  
內官九御自夫人嬪婦以下皆贊王后舉內治以供  
祭祀賓客之事以獻蠶桑種稔織文組就之功以治  
王族嘉好合食內宗三月之教以備喪祭弔唁之禮  
亦如庶司百職之不可缺也羣儒乃力排昏義竝疑  
周官曲禮謂王宮嬪御不宜若是之多蓋以私意淺  
見妄議聖人不知苟王心無主而以欲敗度則惑溺  
專妬即二人亦足以羸王躬而亂百度果能正心

脩身以齊其家則九嬪世婦女御之備官恪共內職以廣世嗣二南之化實基於此周公建官自王宮嬪婦以及奄寺暱近之人膳服瑣細之事皆屬於冢宰務使禮度脩明君心順正小無所忽大不可踰乃正心脩身之防維興道致治之樞紐也

餘論魏氏校曰易剝之為卦上九以一陽載於羣陰君象也五率羣陰以承一陽故有貫魚以宮人寵之象然孤陽處於羣陰之中鮮不為所斲喪故卦義為

剝古聖王謹之自九嬪而下世婦女御皆闕其數而不備傳春秋者復述孔子之意謂天子一娶惟十有二女其間有待年於國者俟少者年及則長者已衰前後所御實不過數人而已

女御

正義鄭氏康成曰昏義所謂御妻御猶進也侍也

賈氏公彥曰其職云掌御叙於王之燕寢

女祝四人奚八人

祝之六反鄭  
徐之又反

正義賈氏公彥曰其職云掌王后之內祭祀凡內禱祠之事故在此 朱子曰古人立法無所不備有是事則立是官如宮中祈祝之事專立女祝以掌之自無後世巫蠱之禍矣

通論鄭氏鍔曰人不得其安則祈福於神聖人因人情而設巫祝之官故司國祀則有大祝小祝甸祝詛祝之司在王宮則有女祝

女史八人奚十有六人

正義賈氏公彥曰其職云掌王后之禮職內治之貳  
與王之大史掌禮同 張子曰女史八人書王后言  
動以佐內治及進御煩碎之事皆書之故后夫人以  
下莫不懼而增德 陳氏傳良曰王后有女史視聽  
言動安得不正 鄭氏鍔曰天子有史官記言記動  
故不敢有過舉后與王同體故有女史

辨正劉氏彝曰女史掌王后之禮職內治之貳則必  
有道藝而知禮者鄭氏以為女奴曉書者非也蓋擇

女御之賢者為之

典婦功中士二人下士四人府二人史四人工四人賈  
四人徒二十人

正義鄭氏康成曰典主也典婦功者主婦人絲枲功  
官之長 賈氏公彥曰絲枲有善惡貴賤故須賈

陳氏傳良曰以下三職悉用士人先王以是為奢儉  
所係內治所關非士大夫為之恐害國政惟與內宮  
相關通如內司服縫人之類必不得已乃用奄耳



案典婦功為布帛之總司則布帛之入尚有當整治者所以有工四人典絲典枲則不煩設工也

典絲下士二人府二人史二人賈四人徒十有二人

正義賈氏公彥曰其職因婦功故在此 王氏昭禹

曰一蠶所吐為忽五忽為系二系為絲絲所以為帛者

典枲下士二人府二人史二人徒二十人

枲絲里反

正義賈氏公彥曰案喪服傳牡麻者枲麻也則枲是

雄麻對苴是麻之有實實者也亦與典婦功連類在此鄭氏鍔曰布有出於麻者亦有出於草者如蒧如越為締為綌然出於麻者為多故以典臬名官案絲所成者名類既多精麤不一低昂有未易悉者故設賈也布則升數有定望而可知即為締為綌數種而已不必賈而後辨之故不設

內司服奄一人女御二人奚八人

正義鄭氏康成曰主宮中裁縫官之長鄭氏鍔曰

王之服掌於春官后之服掌於天官天官掌王內之政令故也 賈氏公彥曰衣服事多須男子兼掌以與婦人共職故用奄

案女御即上經女御在世婦之次者女御多人於其中使二人為內司服八人為縫人耳非別一項也餘論鄭氏康成曰有女御者以衣服進或當於王廣其禮使無色過

縫人奄二人女御八人女工八十人奚三十人

縫扶容反

正義賈氏公彥曰奄二人亦縫線事多須用男子也

案女御之下別列女工則為內人明矣

染人下士二人府二人史二人徒二十人

染日豔反又日掩反

正義王氏應電曰染人司嬪婦染凍之事故與典絲

典臬聯事竝屬典婦功也其他染職宜屬冬官

追師下士二人府一人史二人工二人徒四人

追都隈反

正義鄭氏康成曰追治玉石之名

賈疏詩云追琢其章

賈氏

公彥曰王之首服在夏官弁師此婦人直取首服配

衣故連類在此

屨人下士二人府一人史一人工八人徒四人

屨九裕反

正義賈氏公彥曰屨人兼掌王及后之屨鳥者以屨鳥在下體賤故男子婦人同官 鄭氏鍔曰有鳥有屨名官特曰屨人者鳥止於朝覲祭祀時服之而屨之用多且通於上下也

夏采下士四人史一人徒四人

夏戶瓦反采此海反或作菜

正義鄭氏康成曰夏翟羽色禹貢徐州貢夏翟之羽

有虞氏以為縷後世或無故染鳥羽象而用之謂之

夏采


賈疏翟雉名案考工記鍾氏染羽若有自然鳥羽則不須染故云後世或無

賈氏

公彥曰伊洛而南素質五采皆備成章曰翬江淮而南青質五采皆備成章曰鷩夏即五采也

案大學之道治國平天下必本於脩身齊家而其原又在格物致知誠意正心蓋必如此而後表裏無隔細大畢貫家宰之屬驟視之若紛雜瑣細而究其所以設官之意則於天子誠意正心脩身齊家治國平

天下之事皆統焉所以為師保之任而非五官之比也至於格物致知之學則師氏保氏導養有素而隨事而究察焉者皆是也



欽定周官義疏卷一